


Ang Dapit Nga Gipili Sa Dios Sa Pagsimba

 Magpabilin ta sa pagtindog sa makadiyot lamang samtang atong iduko ang atong mga ulo alang sa pag-ampo. Ug karon, uban sa atong mga ulo nga giduko, ug masaligon ako nga ang atong mga kasing-kasing miduko, usab, wala ako makasiguro kong pila ang ania dinhi niining gabhiona nga buot magpahinumdom sa pag-ampo, sa mga butang pinasahi? Mahimo bang iisa lamang ang inyong mga kamot, moingon, “Dios, ihatag kanako niining gabhiona ang akong gipangita.” Ang Ginoo magapanalangin kaninyo.

² Among Langitnong Amahan, samtang moduol kami karon nga mapina-ubsanon niining dakung Trono sa kalooy, pinaagi sa pagtoo, kami mobalhin ngadto sa Unahan; diin ang Dios, ug ang mga Manulonda, ug ang mga Querubinis, ug ang tanan nga Langitnong panon nanagkatigum. Tungod kay nagaingon Siya nga walay bisan usa ka maya nga mahulog sa yuta nga wala mahibalo-i kini sa Langitnong Amahan. Unsa pa ka ha nga Siya nahibalo dinhi nga kining gatusan ka mga katawhan nga nagaduko sa ilang mga ulo, ug nagatawag Kanimo alang sa pinasahi nga mga hangyo. Amahan, sud-onga kining kalibutan nga nanginahanglan niining gabhiona, tungod kay kami ang katawhan nga mga kabus.

³ Ug naga-ampo ako, Dios, nga tungod kay nagakahiusa kami dinhi ug nagapadayag diha Kanimo sa among pagtoo sa buhing Dios Kinsa motubag sa pag-ampo; migula kami gikan sa taliwala sa kalibutan sa mga walay circuncicion, sa kasing-kasing ug mga igdulogog, nanggula aron nga magkinabuhi sa usa ka pinasahi nga kinabuhi, ug sa pagpuyo diha sa pagtug-an sa among pagtoo Kanimo. Ug niining gabhiona among gibayaw ang among mga kamot, ug nagkanayon, “Mga kabus kami.” Mahal nga Dios, tubaga ang matag hangyo nila.

⁴ Ug dayon, Amahan, nagaampo kami nga duawon Mo kami niining gabhiona diha sa Pulong. Mianhi kami alang sa pagpanton, alang sa pagsabot, aron kami masayud kong unsaon pagkinabuhi dinhi niining panahon karon; unsay lauman ngadto sa unahan, unsay pagabuhaton. Sanglit, kay nahibalo kami nga ang Pag-abot sa Ginoo nagkahiduol na, sumala sa tanan nga mga ilhanan nga giingon ng daan sa mga propeta. Nagkahiduol na kami sa takna, Ginoo, sa dihing ikahatag na ang hingpit nga kagawasan ngadto sa Imong mga anak. Dios, tugoti kami, ang matag usa, nga ma-atua didto, Amahan. Hinaut nga walay usa didto nga mawala. Mao kana

ang among katuyoan sa pag-anhi dinhi, Ginoo. Nahigugma kami Kanimo, ug naninguha kami sa pagpangandam alang nianang takna-a.

⁵ Makigsulti kanamo, among gihangyo pag-usab, niining gabhiona. Ug ayoha ang masakiton. Ang tanan masakiton ug ang nagaantus nga ania dinhi sa tigumanan, nagaampo kami nga Imong ayohon sila, Ginoo; ug ilabina kanila nga adunay espirituhanong panginahanglan. Nagaampo kami nga Imong luwason ang matag kalag nga nangawala. Pun-a ang matag magtotoo sa Espiritu Santo. Ug bag-oha ang kusog ug Gahum diha sa Imong matinoohong mga anak. Itugot kining mga butanga, Amahan. Daghan ang among gipangayo, tungod kay gisugo Mo man kami sa pagpangayo, “pangayo ug kadagaya, pangayo alang sa dagkung mga butang, daghan kanila,” aron ang among kalipay mamahingpit. Ug kanang tanan among gipangayo sa Ngalan ni Jesus Cristo. Amen.

Makahimo na sa paglingkod.

⁶ Sa tinud-anay akong giisip kini nga usa ka dakung kahigayonan niining gabhiona, nga nakabalik dinhi sa intablado pag-usab, dinhi niining hataas nga tulonghaan, aron sa pag-atubang niining maayong mga tawo nga nagakatigum aron sa pagpaminaw sa Maayong Balita. Nagaampo ako sa kalooy sa Dios aron pagtabang kanako sa pagsugilon kaninyo sa Kamatuoran sumala sa nahibaw-an ko sa Kamatuoran. Siya sa gihapon makahimo pa sa pagpatakum sa baba sa usa ka tawo, sama nga nahimo Niya sa baba sa leon. Ug kon pananglit man makalitok ako ug bisan unsang butang nga sayop ug supak sa Iyang kabubot-on, ang akong matinud-anon nga pag-ampo mao nga Iyang tak-umon ang akong baba, aron nga dili ko kini ikasulti. Sanglit kay, sa tinud-anay, gusto kong makaadto sa Langit, sa akong kaugalingon; ug dili gayud ako makaadto didto, ug, labaw nianang tanan, ako mahimong usa ka mini nga lider, usa ka tawo nga nagbuhat ug kasaypanan. Kong buhaton ko kini, kana tungod kay wala ako mahibalo sa kalainan. Ang Ginoo magapanalangin kaninyo.

⁷ Karon, ugma sa buntag, kong kini maoy kabubot-on sa Dios, akong gilaraw ang paghisgot diha niinang hilisgotan nga, *Kasal Ug Panagbulag*. Ug, maglaum kami nga mo-anhi kamo, ug magdala sa inyong mga lapis ug mga papel. Dili ta kaayo madugay, apan buot ko lang. . .Mao kana ang akong katuyoan sa pagbalik dinhi, una sa tanan, sa Indiana, nga akong gisaad kaninyo kana. Ug akong paninguhaon, ugma sa buntag. Kon dili ko kini mahimo ugma sa buntag, buhaton ko ugma sa gabii. Apan akong paninguhaon ugma sa buntag, kong itugot sa Ginoo, aron sa paghisgot niana nga hilisgotan, ang duha ka mga tunghaan sa mga panghuna-huna. Ug hinaut nga ang Dios motabang kanato aron masayran kong unsa ang Kamatuoran,

aron laman mahibaw-an kung unsa ang Kamatuoran, aron lamang mahibalo-an paglakaw diha sa Kamatuoran ug diha sa Kahayag. Kita . . .

⁸ Nahibalo ba kamo, adunay naandang tigulang nga lingalang nigro. Iingnan niya ako, matud niya, “Igsoon Billy,” matud niya, “Dili ako—ako buot nga adunay bisan unsang kagubot didto sa suba.” Matud niya, “Buot ko nga adunay akong tiket sa akong kamot. Ug kong motunog na ang pito, dili ko gusto ug bisan unsang kagubot didto. Akong gipangayo sa Ginoo, sa dugay na nga panahon, kong anaa may bisan unsang sayop, tugoti ko sa paghusay niini karon dayon,” matud pa, “tungod kay mamahimong mangitngit ug mabagyohon niadtong buntaga sa dihang mibiya na ang barko alang sa pikas nga daplin.” Matud pa, “Dili ako gusto nga adunay bisan unsang pagpanghilabot. Buot ko nga atimanon kining tanan karon.” Mao kana ang katuyo-an nga ania ta, maningkamot sa pag-atiman sa tanan nga mga kasamok, aron kita makahimo sa paglakaw nga pagsakay nianang takna-a.

⁹ Karon, dili ako magdugay sa pagpakighisgot kaninyo niining gabhiona, tungod kay adunay atong duha ka mga bulohaton ugma. Ug unya mogikan dayon ako, ngadto, alang sa lain, dugang mga bulohaton.

¹⁰ Apan, karon, diha sa Libro sa Deuteronomio. Akong gustong basahon gikan sa ika-16 nga kapitulo, unang tulo ka mga bersiculo, sa Deuteronomio 16:1 hangtod 3.

Saulogon mo ang bulan sa Abib, ug bantayi ang pasko . . . ni Jehovah nga imong Dios: . . . kay sa (ika-upat) nga bulan sa Abib gikuha ikaw ni Jehovah nga imong Dios gikan sa—gikan sa Egipto sa gabii.

Ug maghalad ka sa pasko kang Jehovah nga imong Dios, gikan sa mga carner o ug sa mga baka, sa dapit nga pagapili-on ni Jehovah nga papuy-an sa iyang ngalan.

¹¹ Karon, ang akong hisgotan niining gabhiona mao: *Ang Dapit Nga Gipili Sa Dios Sa Pagsimba.*

Kong inyong namatikdan, ang bulan A-b-a-d . . . -b kana, nagpasabot, nga, “Abril.” Ang bulan sa Abril maoy panahon nga gikuha sila.

Ug karon ang butang nga katingalahan mao nga kita niining gabhiona, ingon nga magsisimba sa Dios, niining panahona nga niini ani-a kita, ug atong nahibaloan ang mga nagakalain-laing panghuna-huna sa katawhan. Ug samtang nga adunay mga nagakalain-laing panghuna-huna bahin sa usa ka butang, adunay usab nga nagkalain-laing mga pangutana; adunay usa lamang hustong tubag sa matag pangutana nga gipangutana.

Kung ako mangutana sa pangutana nga, “Unsa man *kini*?”
 “Bueno,” moingon sila nga, “usa ka lingkoranan.”

“Unsa may kagamitan niini?” Tan-awa?

¹² Karon, diha, tingali’g adunay usa nga moingon, “Dili kini lingkoranan. Tabla kana.” Bueno, kini usa ka tabla, apan usa kini ka lingkoranan. Nakita ninyo, kinahanglan adunay hustong tubag alang niini.

Ug kong mangutana ako bahin sa bisan unsang butang, adunay usa gayud ka hustong tubag. Mahimo nga adunay butang nga haduol niini; apan adunay usa ra gayud ka husto, ug laktod nga tubag sa matag pangutana. Busa, sa ingon, sa matag pangutana nga moabot sa atong mga kinabuhi, adunay usa ka matuod, ug husto nga tubag.

¹³ Ug karon, niining adlaw, atong nadungog—nadungog kining ginaingon, sa kadaghan sa atong katawhan sa kalibutan karon. . .

Ingon nga usa ka misionaryo, nakabiyahi na sa makadaghan latas sa kadagatan ug sa tibuok kalibutan, ako nang nalimamat ang daghang nagkalain-laing mga relihiyon, maingon sa Buddha, ug Mohammedan, ug Sikhs, ug Jains, ug uban pa, sa mga relihiyon sa kalibutan. Ug unya dinhi sa atong kaugalingong Estados Unidos; ug sa uban pang langyaw’ng kanasuran, nakatagbo sa tanan natong nagkalain-laing mga iglesia, sama sa atong mga kaiglesiahan sa denominasyon, sugod sa unang Romano Katoliko, ug unya ngadto sa Greigo, ug uban pa, ug ang—ang nagkalain-laing tulomanon, ug unya paubos ngadto sa. . . tanang denominasyon sa kapanahonan, sa siyam ka gatus ka nagakalain-laing mga Protestanteng denominasyon.

Karon, ang matag usa kanila, natural, makita mo ang ilang pangaggpas, ug dili ko sila mabasol. Ang matag usa moangkon nga sila mao ang tinuod, anaa kanila ang kamatuoran. Ug ang katawhan nga sakop nianang maong mga iglesia kinahanglan motuo niana, tungod kay ilang gitahan ang ilang—ilang distinasyon, ang ilang distinasyong Eternidad, sumala sa gitudlo nianang maong iglesia. Ug hilabihan ang ilang panagkasumpakiay, sa usa ug usa, hangtud nga kini miabot sa siyam ka gatus ug adunay mga nagakalain-laing pangutana.

Busa sanglit, kay siyam man ka gatus ug maingon nga adunay nagkalain-laing mga pangutana, kinahanglan adunay usa lamang ka hustong Tubag. Ug gusto ko alang sa matag-usa kanato niining gabhiona, maingon nga naninguha ta sa pag-adto sa Langit, ug aron sa pagpakigtambo sa atong Ginoong Jesus Kinsa maoy atong gihigugma, buot kong susihon sa mga Kasulatan sa pagpangita niana.

¹⁴ Karon, kong kini usa ka pangutana sa Biblia, nan kini adunay tubag sa Biblia. Dili kini mahimong magagikan sa usa ka pundok sa tawo, gikan sa usa ka pundok, o gikan sa usa ka tigmatuto, o gikan sa mga denominasyon. Kini sa laktod magagikan gayod sa Kasulatan, diin didto ang dapit nga tagbu-anan sa Dios anaa, alang sa pagsimba. Ug sa tinud-anay, ingon nga Dios, adunay usa ka dapit nga tagbu-anan niana, nga Siya makigtagbo.

¹⁵ Karon, atong hingkaplagan dinhi nga sa Deuteronomio, diha sa sinugdanan, gibalik pagbasa ni Moises ang Kasulatan, sa mga butang nga iyang giingon kanila; kong giunsa Niya sila sa pagpagawas uban sa usa, bukton nga kusgan, gikan sa Egipto, ug gipalig-on una sila . . .

Sila gitawag nga “ang katawhan sa Dios” hangtud nga sila nakagawas sa Egipto, ug dayon gitawag nga “ang iglesia sa Dios.” Tungod kay, ang iglesia usa ka katilingban, o, matuod, ang *iglesia* nagkahulogan nga “mga tinawag pagawas,” kadtong mga gipanagtawag pagawas. Ug mibiya sila sa Egipto, aron mahimo nga iglesia.

¹⁶ Karon gisultihan sila sa Dios, sa dihang sila . . . una sila magbuhat ug templo ug bisan kong unsay ilang ginabuhat, “Akong pilion ang dapit nga Akong pagasimbahan, ug Akong ibutang ang Akong Ngalan sulod niini.” Ug mao lamang kana ang bugtong dapit nga ang Dios sa kanunay makigtagbo kang bisan kinsa, sumala sa Iyang Kaugalingong pagpili. Iyang gipili ang Iyang dapit. Ug diin ang Iyang dapit nga Iyang gipili, Iyang gibutang ang Iyang Ngalan. Ang ika-duhang bersiculo dinhi nagsugilon kanato nga, “Iyang igabutang ang Iyang Ngalan diha sa dapit nga Iyang napili alang sa katawhan nga mosimba Kaniya.” Karon, ang butang niini mao nga, atong pangitaon kong hain kanang maong dapit.

¹⁷ Uban sa siyam ka gatus ug lain pang nagkalain-laing pangagpas, maingon nga atong gilagpasan ang tanang paganong mga relihiyon, ug igo lamang nagahisgot sa Cristohanon nga relihiyon. Bisan, ako adunay pagbati alang sa mga pagano, o ako sa tinud-anay dili gayod moadto didto ug makigsulti kanila. Apan, nangasayop sila. Ang Cristohanon maoy bugtong relihiyon nga tinuod, mao ang Cristohanon. Ug akong gisulti kana dili tungod kay ako Cristohanon; tungod kay, ako nagatoo nga kana mao ang Kamatuoran. Kini mao ang bugtong nga relihiyon nga husto.

¹⁸ Nakaadto ako sa lubnganan diin ang puti nga kabayo pagapulihan sa matag upat ka oras. Diin, si Mohammad, ang bantugan nga pari ug—ug magtutudlo sa wala na si Cristo, nga nagpaka-aron ingnon nga usa ka propeta, ug, wala ako magduha-duha kong kinsa siya kaniadto, sa pagkatapos gayod sa mga managsoon nga Maccabeos. Apan sa ilang . . . Siya

namatay. Siya nagpatoo nga mabuhi ra siya pag-usab ug buntugan ang tibuok kalibutan. Karon, sa matag upat ka oras ilang pulihan ang mga magbalantay, ug kanunay adunay usa ka puting kabayo nga ilang gibutang sa iyang lubnganan. Aduna nay ilang, mga duha ka libo ka tuig, nga naghulat kaniya nga mabuhi pag-usab ug buntugan ang kalibutan. Apan nakita ninyo . . .

¹⁹ Ug adto kamo kang Buddha; si Buddha buhi sa daghan gatasan ka mga katuigan, mga kaluhaan ug tulo ka gatus ka mga katuigan ang milabay, ang dios sa—sa Hapon. Ug siya usa ka pilosopo, maingon kang Confucius, ug uban pa.

Apan kining tanan, alang . . . mga magtutukod, ug uban pa, silang tanan nangamatay uban sa ilang pilosopiya, ug gilubong ug anaa sa lubnganan.

Apan ang Cristianismo, nga gitukod ni Jesu-Cristo, adunay lubnganan nga walay sulod. Siya mao ra ang bugtong Tawo nga nagpabiling nagbarog sa ibabaw sa yuta, ug nabuhi ug nag-ingon, “Ako adunay kagahum sa pagtugyan sa Akong kinabuhi ug buhion kini pag-usab.” Ug gibuhat Niya kini. Ug buhi Siya karon.

Ug nahibalo kita nga buhi Siya, tungod kay ania Siya uban kanato ug nagpamatuod sa Iyang Kaugalingon pinaagi sa nakitang ilhanan ug mga katingalahan, nga Iyang gisaad nga Iyang pagabuhaton aron nga ipakita kini. Sa ingon nga, usa ka Haligi nga Kalayo nga nag-una sa mga anak sa Israel diha sa kamingawan, kini ania kanato karon, bisan gani nakuhaan Kini sa hulagway nakuha kini; nga nagapamuhat sa mga ilhanan ug mga katingalahan nga gisaad Niya nga Kini mahitabo niining panahona, sa nakita nga ang tanang mga Pulong nga Iyang gisaad nahimong dayag niining panahona. Busa, ang uban pang mga paganong kalibutan gawas na. Kini Cristohanon na!

²⁰ Karon, maingon nga adunay siyam ka gatos ug mga pangutana kung hain makigtagbo ang Dios, “Siya makigtagbo uban sa Metodista, o Siya makigtagbo diha Baptist, ug Siya makigtabo *dinhi* niini, ug *diha*, ug sa *uban*.” Karon, anaay pangutana diha, busa ang matag-usa kinahanglan nga mangita sa iyang kaugalingong kaluwasan uban sa kahadlok ug pagkurog.

Apan niining gabhiona akong paninguhaon sa pagpangita, ug pamatud-an diha sa Kasulatan, kong hain ang hustong dapit diin ang Dios makigtagbo ug magsimba kauban sa katawhan. Ug, kong kana mao man, kana mao lamang ang bugtong dapit nga Siya sa kanunay makigtagbo.

²¹ Karon, atong gikuha kining teksto gikan sa Deuteronomio. Kini usa ka Greigong pulong nga adunay duha ka mga

kahulogan, o, kini nagpasabot nga, “duha ka mga kasugoan.” Ang Greigong pulong, *Deuteronomio*, nagkahulogan ug “duha ka mga nagakalahi nga mga kasugoan.”

Ug mao lang kana ang iya sa Dios, duha ka mga nagakalahing kasugoan. Ug ang usa kanila mao ang kasugoan sa kamatayon, ug ang laing usa mao ang kasugoan sa Kinabuhi. Ang Dios adunay duha ka mga kasugoan. Alang sa pagsunod Kaniya, ug pag-alagad Kaniya ug pagsimba Kaniya, kini Kinabuhi; ang pagsalikway Niini kamatayon. Adunay duha ka mga kasugoan sa Dios.

²² Karon, ang usa niadtong maong sugo mao ang pag-... gipaila sa kalibutan, didto sa Bukid sa Sinai. Ang Dios naghatag ug kasuguan kang Moises ug sa Israel. Dili aron nga ang kauguan makatabang kanila, apan ang kasugoan magatudlo kanila nga sila makasasala. Hangtud niadtong panahona, wala sila masayod kong unsa ang sala, hangtud nga sila may kasuguan na. Dili mahimo ang balaod kong walay usa ka silot. Ang balaod dili mahimong balaod, kong walay silot. Mao, nga, “Ang paglapas sa kasuguan sala, ug ang bayad sa sala mao ang kamatayon.” Busa sa ingon niana, hangtud nga gibuhatan sila sa Dios ug kasuguan, walay kalapasan nga giisip kanila.

Kong wala pay balaod dinhi nga nag-ingon dili ka makapadagan sa kapin sa kaluhaan ka milyas sa usa ka oras, sa ingon makapadagan ka sa kapin sa kaluhaan ka milyas sa usa ka oras. Apan kong adunay usa ka balaod nga nag-ingon dili mo kini pagabuhaton, nan adunay usa ka balaod ug silot nga nagpaluyo niini.

²³ Karon, ang kamatayon, ang balaod sa kamatayon, mao ang mga kasugoan nga gihatag sa Bukid sa Sinai, nga nagsulti sa tawo nga siya makasasala. Ug, ang paglapas sa balaod sa Dios, siya mamatay. Apan walay kaluwasan diha sa kasugoan. Ang... Kini usa lamang ka polis nga maoy mobanlud kanimo sa bilangoan; walay mahimo niini sa pagpahigawas kanimo.

Apan unya Siya naghatag ug laing balaod, kini didto sa Bukid sa Calbaryo, diin ang sala gipahamtang kang Jesu-Cristo, ug didto ang silot gibayran na. Ug dili pinaagi... Dili sugo, “apan pinaagi sa grasya naluwas ka,” pinaagi sa grasya sa Dios, pinaagi sa laraw nang daan sa Diosnong kahibalo sa imong pagkatawo.

²⁴ Karon atong nakita kining duha ka mga balaod, *Deuteronomio*, nagahisgot sa duha ka mga balaod. Dihay duha ka mga balaod. Ang usa mao ang balaod sa kamatayon, ug ang laing usa mao ang balaod sa Kinabuhi.

²⁵ Dihay duha ka mga pakigsaad usab nga gihatag sa katawhan. Atong hisgotan sila sa buntag.

Ang usa kanila gihatag kang Adam ubos sa kasabotan, “kon buhaton mo *kini* ug dili pagabuhaton *kana*,” apan ang balaod naguba. Si Adam, si Eva maoy naguba niana, sa tanaman sa Eden.

Human niana ang Dios nagbuhat ug ikaduhang pakigsaad, ug gihatag kana kang Abraham, ug kadtong maong balaod walay kasabotan. “Dili kong unsay imong nabuhat o unsay imong pagabuhaton:” Siya miingon, “Gibuhat Ko na kini.” Mao kana ang grasya. Mao kana ang balaod sa Kinabuhi. Gibuhat kana sa Dios alang kang Abraham ug sa iyang Kaliwat nga nagsunod kaniya, nga mao, ang tanang Kaliwat ni Abraham.

Sumala sa giingon sa Biblia, “Pagaluwason ang tibuok Israel,” apan kana wala magpasabot nga mga Judio. Sumala sa giingon ni Pablo, “Kanang Israel nga anaa sa sulod, o Israel nga anaa sa gawas.” “Sa gawas,” sumala sa atong gihisgotan sa miaging gabii, mao kadtong mga kaliwat ni Isaac, pinaagi sa tawhonong pagbuot. Apan ang balaod sa Dios pinaagi kang Cristo, nga mao ang Harianong Kaliwat ni Abraham, nga niana, “pinaagi sa grasya ang tanang Israel giluwas.” Kana, “Ang tanan nga anaa kang Cristo naluwas na,” tanan, ang ikaduhang saad sa Dios. Apan kining tanan butang naglandong kang Cristo.

²⁶ Karon hibaw-i ang ikaduhang bersiculo. Ang ikaduhang bersiculo dinhi sa Deuteronomio 16, “Magsimba diha sa dapit nga Akong gipili.” Karon kinahanglan nga simbahon mo ang Dios, Siya nag-ingon, “Sa dapit nga Akong gipili,” dili nga kong unsay gipili ni bisan kinsa, apan, “kong unsa ang Akong gipili.”

Karon, kong ang Dios nagpili ug usa ka dapit, angay diay kanato ang pagpangita kong unsay Iyang giingon bahin niini. Ug kong hain kini? Gusto ko nga pangitaon kini, tungod kay, sa pagkatinuod, gusto ko nga mosimba Kaniya.

Ania kitang tanan dinhi, niining gabhiona, aron nga simbahon Siya. Naglingkod kita dinhi niining gabhiona, nga mga Metodista, Baptist, Katoliko, Saksi ni Jehova, Christian Science, ug ang tanan, apan kitang tanan nagapangita ug usa ka butang.

Buot kita nga mahibalo sa Kamatuoran. Ang Biblia nag-ingon, “Mahibalo kamo sa Kamatuoran, ug ang Kamatuoran magahatag kaninyo sa kagawasan.”

Usa ka tawo, nga wala mo mahibalo-i kong unsay imong ginabuhat, dili ka masayud kung unsaon sa pagbuhat niini hangtud nga masayud ka kong unsaon sa pagbuhat niini; wala ka mahibalo kong unsaon sa pagbuhat hangtud nga mahibalo ka kong unsaon sa pagbuhat niini, diay. Kinahanglan nga mahibalo ka kong unsay imong ginabuhat ug kong unsaon sa pagbuhat niini.

²⁷ Kini nagapakita kanato nga ang Dios adunay usa ka dapit nga tigumanan alang sa Iyang mga magsisimba, sa usa ka matuod nga dapit. Nianang maong dapit, lamang, ang Dios makigtagbo sa Iyang mga magsisimba.

²⁸ Karon, usab, ang dapit nga Iya nang gipili alang sa Iyang mga magsisimba, nga Iyang giangkong nga Iyang ibutang ang Iyang Ngalan. Karon atong susihon ug pangitaon, pinaagi sa Kasulatan, kong hain kining maong dapit. Sa pagkatinuod, kong mag-ingon ang Dios nga Iyang igabutang ang Iyang Ngalan niining maong dapit nga maoy Iyang gipili aron sa pagpakigtagbo sa katawhan ug mosimba kauban kanila...o sila maoy mosimba Kaniya, diay, mao kana ang anaa diha sa Biblia, tungod kay alang kini sa tanang kapanahonan.

²⁹ Ug ang daku ug walay pagka-usab nga Dios dili gayud mausab. Ang tawo magkausab-usab. Apan mahimo nimo nga ibutang sa imong kinabuhi diha sa bisan unsang butang nga gihisgotan sa Dios kanunay sa bisag asa nga panahon, tungod kay kini mao ang Kamatuoran. Kini maoy Kamatuoran. Tungod kay, mao kana ang bugtong butang nga niini makabaton ako ug pagsalig, nga mao ang Biblia. Tungod kay, mapakyas ang pulong sa tawo, apan ang sa Dios maoy labing gamhanan.

Niining tuiga mahibalo ako ug labaw pa kay sa akong nahibaloan sa miaging tuig. Kamo kinahanglan, usab, sa matag adlaw. Kita adunay katapusan, busa sa ingon mag-uswag ang atong kahibalo.

Apan ang Dios walay kinutuban. Siya walay kinutuhan. Ug, ingon nga walay kinutuban, dili Siya mag-uswag sa kahibalo. Siya maoy hingpit, sa sinugdan pa. Ang matag hukom kanunay nga husto gayud.

³⁰ Ug ang paagi sa Dios sa pagbuhat sa usa ka panahon, Iyang buhaton sa hangtud ang ingon nga paagi, o nasayop Siya sa pagbuhat sa dihang mibuhat Siya sa unang higayon. Kong ang usa ka tawo moduol lamang sa Dios alang sa kaluwasan, sa ibabaw sa sumbanan nga Siya midawat kaniya, kini kinahanglan nga pagadawaton diha nianang mao ra nga paagi sa matag panahon. Husto kana. Kong ang usa ka tawo moduol lamang sa Dios alang sa Langitnon nga kaayohan, ug ang Dios nagadawat kaniya ibabaw sa usa ka sumbanan; ang lain pang tawo moduol, siya kinahanglan nga pagadawaton Niya sa samang paagi, o nasayop Siya sa dihang Iyang gidawat ang unang tawo. Ang Dios nagbuhat ug paagi nga Iyang matagbo diha ang tawo. Nagbuhat Siya ug sumbanan kong unsay Iyang pagabuhaton, unsaon Niya sa pagbuhat niini, ug kadto pinaagi lang sa halad nga dugo sa usa ka nating carnero didto sa tanaman sa Eden. Ang Dios wala gayud, walay panahon, nga nag-usab niini.

³¹ Siya nakahukom kong unsaon Niya pagluwas ang tawo. Atong gisuwayan karon ang pagmatuto sa tawo diha niini; naninguha ta sa pagpaeskuela kanila, naninguha sa pagmatuto kanila, naninguha sa paghingalan, naninguha sa pagbuhat niining tanang matang sa mga butang; pasudlon sila, lamanuhon sila, bautismohan sila, tanang matang sa paagi, pasudlon sila pinaagi'g sulat. Apan nagpabilin nga mao ra, sa gihapon, ang Dios makigtagbo sa tawo sa ilalum sa giula nga Dugo sa Cordero. Ang Dugo maoy paagi sa Dios sa sinugdan, ug ang Dugo maoy paagi sa Dios niining gabhiona. Maayo ang pagbuhat ug penetinsya ug tanan niining mga butanga, apan ang kaluwasan mapinaagi lamang sa Dugo. Ang Dugo maoy bugtong paagi nga gipili sa Dios aron sa paglawas sa tawo, ug dili kini Niya mahimong ilisan.

³² Si Job adunay managsamang butang. Nahibalo siya nga siya usa ka matarung, tungod kay nakalahad siya sa—sa halad nga gikinahanglan sa Dios kaniya.

³³ Karon, susihon ta karon aron makita kong unsa kining dapita, ug ang dapit nga Iyang gibutangan sa Iyang Ngalan. Atong himo-on ang pagpangita kong diin Niya ibutang ang Iyang Ngalan. Unya dayon, kong atong hikaplagnan kong unsay Ngalan sa Dios ug kong hain kini Niya ibutang, nan atong maangkon ang dapit nga pagatiguman sa diha nga hikaplagnan ta kini.

Tanan kining mga butanga, dayag lamang, nga kini mga landong sa mga butang umalabot. Ang tanan nga mga kasugoan nagalandong sa mga butang nga umalabot.

³⁴ Sama ra, sa bulan nga kini maoy landong sa adlaw. Kini maoy mo-alagad kong wala ang adlaw, sama ra sa Iglesia nga maoy mo-alagad kong wala ang A-n-a-k sa Dios. Kong wala ang Anak, kubos ang Kahayag, ang Iglesia, ang mga magtutoo, mo-alagad sa Dios ug mohatag ug Kahayag ingon nga puli sa Anak. Apan kong mosilang na ang adlaw, dili mo na makita pa ang bulan, tungod kay kini misalop na. Wala na kini magkinahanglan sa kahayag niini, tungod kay kini nagakuha man lang sa iyang kahayag nga igtatabang, gikan sa adlaw. Karon, sama sa bana ug asawa, mao na ang adlaw ug ang bulan, ang Iglesia ug si Cristo.

³⁵ Karon atong hingkaplagnan, nga, kining mga butanga ingon nga usa ka landong ni Cristo. Ang matag halad, pista, ug bisan unsang butang diha sa Daang Tugon, nagalandong kang Cristo; maingon nga ang landong mo-igo sa salog. Karon ania dinhi kong hain nato pangita-a ang hustong dapit sa pagsimba, kini mao lang ang pagbalik sa Daang Tugon kong hain kini ihatag ug tan-awon kong unsa kining mga butanga.

³⁶ Karon, kong ang landong moabot diha sa salog, mahibalo ka kong kini lalake, babaye, o mananap, o tingali'g unsa pa

kini, tungod kay kini mihatag ug landong diha sa salog. Samtang ang anino ming mubo, ang anino dili maklaro; dili mahimong adunay negatibo kong walay positibo. Busa, sa dihang ang positibo magkaduol sa negatibo, ang negatibo mahiusa na sa positibo magkahiusa. Ug samtang ang anino—naghinayhinay sa paghiusa nga malantaw ugma, ug mao kana ang magahimo niini nga positibo.

Ug kong “ang tanang daang butang,” matud pa sa Biblia, “sa Daang Tugon, maoy mga landong sa mga butang umalabot,” o kini si Cristo mao ang anino sa mga butanga uaabot.

³⁷ Sa ingon atong makita, pinaagi sa mga tipo sa Daan Tugon, kong hain ang Iyang gipili aron ibutang ang Iyang Ngalan, ug aron...alang karon. Karon, maingon nga ang landong, anaa na sa salog, sa giingon ko na, nga mao negatib, ingon nga usa ka tipo. Busa kita, ang mga magsisimba, usab makakita sa mga landong sa Daan Tugon nga nagakahanap na diha sa positibo sa Bag-o.

³⁸ Karon, ang tanan nga mga pista, ang mga adlaw sa pangilin, ang tanan nga tabernaculo, ang tanang nga kahoy, tanan butang diha sa tabernaculo, ang tanang butang naga tipo kang Cristo. Ang tanan nga mga halad, tanan nga mga kasugoan, ang tanan butang naga tipo diha kang Cristo. Human na kita niini, hapit sa tanan panahon, dinhi sa tabernaculo.

Ug unya atong makita, pinaagi niini, nga ang matag kredo, iglesia, ug denominasyon nabiyaan na sa halayo kaayo. Ni wala na gani kini sa lumba, bisan pa. Ang matag kredo, matag iglesia, matag denominasyon, sa hingpit nahibilin na. Wala nay nahibilin pang dapit alang kanila.

³⁹ Walay nahimong tipo diha sa Daan Tugon, o bisag diin sa Biblia, bahin sa iglesia, kondili ang hiniusang pinugos sa tori sa Babel. Mao lang kana ang bugtong butang nga naga tipo sa panaghiusa. Tungod kay, kadto pinaagi kang Nimrod, usa ka tawong dautan nga migawas ug gipugos ang tanan magagmay'ng nasud sa pag-adto sa usa ka dapit ug dinhi niining dakung tori. Usa kadto ka relihiyosong pagsimba, dayag nalang, apan wala ilha sa Pulong sa Dios. Tungod niini makita mo diha ang tipo sa relihiyon nga nailalum sa denominasyon, ang tori sa Babel, diha sa Daan Tugon. Nga niini, kining maong relihiyon matuod nga usa ka relihiyon, apan dili kon ang relihiyon sa Pulong sa Dios.

⁴⁰ Ang Dios wala magpili sa pagbutang sa Iyang Ngalan diha sa bisan unsang denominasyon. Nagkinahanglan ako sa Kasulatan alang niini, kong kini mao man. Nahibalo ako nga moangkon Sila nga anaa, apan wala Siya. Dili Niya mahimo ang pagbutang sa Iyang Ngalan sa daghan nga dapit, tungod

kay Siya nag-ingon nga Iyang ibutang ang Iyang Ngalan diha sa usa ka dapit. Ug, kanang usa ka dapit, ang matag usa sa atong mga denominasyon gustong moingon nga sila kanang maong dapit, apan kini kasupak.

Apan diin man Niya ibutang ang Iyang Ngalan?

⁴¹ Karon, ug, Siya, unsa man ang Iyang Ngalan, una pa? Kinahanglan atong (Ngalan) pangitaon kong unsay Ngalan sa Dios sa dili pa nato makita kong unsay Iyang gibutang diha sa dapit.

Karon, atong nahibaloan nga Siya adunay daghan nga mga titulo. Gitawag Siya nga . . . Siya gitawag nga “Amahan,” nga mao ang usa ka titulo. Ug Siya gitawag nga “Anak,” nga mao ang titulo. Siya gitawag nga “Espiritu Santo,” nga mao ang usa ka titulo. Siya gitawag nga “Rosas sa Saron,” nga mao ang usa ka titulo. “Lireo sa Kapatagan,” usa ka titulo, “Bituon sa Kabuntagon,” “Jehova-jire, Jehovah-rapa,” pito ka nagkalain-laing, linangkub, nga matubsanong ngalan, ug kana silang tanan nga titulo. Walay usa kanila nga mga ngalan.

Apan Siya adunay Ngalan.

⁴² Sa Iyang pagpakigkita kang Moises, wala pay Iyang Ngalan, ug Iyang giingnan si Moises, “AKO MAN ANG MAO AKO.” Ug sa atong nakita si Jesus sa ibabaw sa yuta, naghisingot sa Mga Hebreohanon sa ika-6 nga capitulo . . . pasaylo-a ako, San Juan sa ika-6 nga capitulo. Siya miingon, “AKO MAN ANG MAO AKO.”

Miingon sila, “Nganong, Ikaw usa ka Tawo nga wala pa mokapin sa kalim-an ka tuig ang kaguwangan, ug moingon nga Imong ‘nakita si Abraham?’”

⁴³ Siya miingon, “Sa wala pa si Abraham, MAO na AKO.” Ug “AKO MAO” na ang Usa, ang nagdilaab nga kahoy’ng talongon, ang Haligi nga Kalayo nga diha sa nagadilaab nga kahoy’ng talongon balik sa mga adlaw ni Moises, ang “AKO MAN ANG MAO AKO.”

⁴⁴ Ug karon atong nahibaloan nga si Jesus miingon, usab, “Ako mianhi sa Ngalan sa Akong Amahan, ug wala Ako ninyo dawata.” Tungod niana, ang Ngalan sa Amahan mao gayud si Jesus. Husto kana. Ang Ngalan sa Amahan mao si Jesus, tungod kay mao kini ang giingon ni Jesus. “Akong gidala ang Ngalan sa Akong Amahan. Ako mianhi sa Ngalan sa Akong Amahan, ug wala ninyo Ako dawata.” Tungod niana, ang Iyang Ngalan mao si Jesus.

Ug si Gabriel nagtawag Kaniya nga Jesus, ang mga propeta nagtawag Kaniya nga Jesus, ug Siya sa pagkatinuod mao si Jesus. Sa wala pa Siya ipanganak, bisan pa ang balaang propeta gitawag ang Iyang Ngalan nga *Emmanuel*, nga mao kini, “Ang Dios uban kanato.” Tungod niana, “ang Dios

nadayag diha sa unod, aron sa pagkuha sa sala sa kalibutan,” ug, sa pagbuhat sa ingon, Siya gihatagan sa Ngalan nga Jesus. Busa, si Jesus mao ang Ngalan.

Ug ang Ngalan gibutang diha sa usa ka Tawo; dili sa usa ka iglesia, dili sa usa ka denominasyon, dili sa usa ka kredo, kondili sa usa ka Tawo! Siya ang nagpili sa pagbutang sa Iyang Ngalan diha kang Jesu-Cristo. Karon atong nahibalo-an nga Siya nahimong dapit sa Dios sa pagsimba, diin mo Siya masimba.

⁴⁵ Bisan sa wala pa Siya matawo, ang Iyang Ngalan gitawag nang daan ug Jesus. Kini mahinungdanon kaayo, kini gihatag ngadto sa Iyang inahan pinaagi sa Manulonda nga si Gabriel, nga ang Iyang Ngalan pagatawgon “Jesus, ang Anak sa Dios,” unsa Siya kaniadto.

⁴⁶ Didto nakuha ra nato kini, diha niana. Mao na kini, gayud. Kini maoy, alang Kaniya lamang, ang dapit nga gipili sa Dios sa pagsimba. Ang dapit sa Dios, pinili. Gipili sa Dios aron tagbuon ang tawo; dili diha sa iglesia, dili diha sa usa ka denominasyon, diha sa usa ka kredo, kondili diha kang Cristo. Mao kana ang bugtong dapit nga ang Dios makahimo sa pagpakigtambo sa tawo, ug siya mahimo nga mosimba sa Dios, diha kang Cristo. Mao kana ang bugtong dapit. Bisan pa kong Metodista ka, Baptist, Katoliko, Protestante, bisan kong unsa ka pa, adunay usa lamang ka dapit nga makahimo ka sa hustong pagsimba sa Dios, kana anaa kang Cristo.

Mga taga Roma 8:1, nag-ingon, “Busa sila nga anaa kang Cristo Jesus dili na karon mga hinukman sa silot, nga wala magalakaw sumala sa unod, kondili sumala sa Espiritu.” Mao kana ang Maayong Balita.

⁴⁷ Mahimong magkapalain ta diha sa mga kredo. Mahimong magkalain ta diha sa mga binuhat nga pangagpas sa tawo. Makahimo ka sa pag-adto sa iglesia sa Methodista, kinahanglan nga mahimo ka nga Mehtodista; sa Baptist, isa ka Baptist; sa Katoliko, usa ka Katoliko. Apan sa higayon nga ikaw mabautismohan diha kang Cristo, ug mahimong usa ka sakop sa Iyang Lawas, diha niana wala nay pag iya-iyahay. Ang bong-bong sa taliwala nga nag-ulang mabungkag na ug ikaw gawasnon na, tungod kay ikaw anaa na kang Cristo Jesus. Ug ikaw magasimba na sa Dios sa Espiritu ug sa Kamatuoran kong anaa kana kang Cristo Jesus. Kini mao ang laraw sa Dios alang kanimo sa pagsimba Kaniya diha kang Cristo Jesus.

⁴⁸ Karon, walay iglesiang denominasyon nga makapangangkon niini, walay usa nga makapangangkon niana. Unsa ka mapangahason sa pagbuhat ug ingon nga pangangkon? Ang pagbuhat sa ingon nga butang usa ka anti-cristo nga espiritu, mahimong mapahilayo ka gikan kang

Cristo; aron sa pagpahilayo gikan Kaniya. Dili mo mahimo kana. Si Cristo mao lang ang bugtong dapit nga ang Dios makigtagbo sa mga magsisimba.

⁴⁹ Sila miingon, karon. Adunay akong katawhan nga mosugilon kanako. Usa ka tawo mitawag kanako dili pa lamang dugay, sa Beaumont, Texas. Matud niya, “Mr. Branham, kong ang imong ngalan wala sa among libro sa iglesia, dili ka makaadto sa Langit.” Mahimo mo bang pamalandungan kana? Ayaw ug tuhi ang ingon nianang butanga. Nagtoo sila nga kinahanglan mahimo kang sakop nianang usa ka iglesia o nga dili ka makaadto sa Langit. Sayop kana. Ang pagtoo niana, maoy anti-cristo. Akong isulti kini: kong motoo ka sa ingon nga espiritu, mawala ka. Mao kana ang maayong ilhanan nga ikaw mawala, tungod kay kini maoy pagkuha kung unsay gibuhat sa Dios. Ang Dios wala gayud magbutang sa Iyang Ngalan diha sa bisan unsang iglesia. Iyang gibutang Kini diha sa Iyang Anak, si Cristo Jesus, sa diha nga Siya ug ang Iyang Anak nahimong Usa. Mao kana ang tinuod nga dapit sa pagsimba. Walay laing patukuranan nga gikapahimutang na, wala nay laing bato.

Si Cristo, maong Bato malig-on, baro-ganako;

Tanan lang patukuranan mahuyong-huyong.

Ang mga denominasyon malumpag ug mapukan, ang mga kanasuran manga-hanaw, apan Siya magpabilin sa kahangturan. Walay laing dapit nga mahimong hikaplagaan sa usa ka tawo, aron sa pagsimba sa Dios, nga motubag ang Dios kaniya, walay laing dapit kondili diha kang Cristo Jesus. Mao kana ang bugtong dapit, ang bugtong dapit nga gipili sa Dios aron butangan sa Iyang Ngalan, ug ang bugtong dapit nga Iyang matagbo ang tawo, aron sa pagsimba. Mawala ka, ka sa pagtoo sa lain pang butang.

⁵⁰ Hibaw-i, ang tanang pito ka mga pista sa Judio gisaulog diha sa mao rang dapit. Dili gayud sila magsaulog ug usa ka pangilin *dinhi* alang sa Metodista, ug usa *dinhi* alang sa Baptist, usa *didto* alang sa Presbyterian, usa *diri sa luyo* alang sa Katoliko, ug usa alang sa Protestante. Ang tanang pito ka mga pangilin gisaulog sa usa ra ka dapit.

⁵¹ Kini maoy usa ka matahum nga tipo dinhi. Dili pa lamang dugay nga natapos nato ang Pito ka mga Kapanahonan sa Iglesia, nga nagapakita nga ang Dios nagbantay sa tanang Pito ka mga Kapanahonan sa Iglesia diha sa Pulong, tungod kay ang matag panahon sa iglesia naghatag ug usa ka bahin sa Pulong, ug sa matag panahon nga mohatag sila niini nakita nila ang Kahayag.

Sama ra sa mga katawhan nga unang nakakaplag sa pagbautismo sa Ngalan ni Jesus. Unsa man ang ilang gibuhat?

Nagbuhat sila ug denominasyon gikan niini, ug kini namatay diha mismo niana. Human niana ang Dios mibiya diha ug miadto sa laing tawo. Dili Siya mopabilin diha nianang mga kredo ug mga dogma. Walay Iyang mahimo diha niana. Walay butang hiwi mahitungod sa Dios. Ang Pulong sa Dios balaan, wala mahugawi. Si Cristo mao ang Ginoo ang kinauyokang tulpok sa pagsimba. Siya mao ang Dios.

⁵² Ang tanang pito ka mga pista kinahanglan gayud nga pagasaulogon dinhi niining usa ka dapit. Dili mo mahimong saulogon ang pista sa bisan hain nga dapit. Apan silang pito, ang dapit. . . Ang pito ka mga pista sa tuig kinahanglan gayud nga pagasaulogon diha sa usa ka dapit. Busa, ang Pito ka mga Kapanahonan sa Iglesia nagagikan gayud sa usa ra ka dapit, mga mao si Cristo nga misulti diha sa tanan Pito ka mga Kapanahonan sa Iglesia. Kana ang husto gayod. Tipo, sa Pito ka mga Kapanahonan sa Iglesia, apan gikan niini sila nagbuhat ug denominasyon.

⁵³ Karon atong tan-awon ang lain pang tipo samtang ania pa kita dinhi, kana maoy tipo sa pasko, nga nagalarawan kang Jesus. Dinhi niini atong namatikdan ang paghalad sa dugo, pinaagi'g kamatayon. Ang paghalad ug dugo mao ang dapit nga nagalarawan kang Cristo. Makahimo ba sa pagdugo ang usa ka denominasyon; naisip mo ba nga adunay usa ka iglesiang nagkadugo, usa ka pagdugo sa denominasyon? Sa pagkatinuod wala. Kini nagkinihanglan ug dugo, nga modugo gikan sa kinabuhi. Ug, ang kinabuhi, dinhi si Jesus mitungha diha sa panagway sa nating carnero. Ang nating carnero maoy tipo kang Cristo, ug nagalarawan kang Cristo, tungod kay Siya mao “ang Cordero sa Dios,” nga gipaila ni Juan, “nga mao ang magkuha sa sala sa kalibutan.” Atong makita si Jesus nga miabot diha sa tan-awa, dinhi ni Exodus sa ika-12 nga capitulo.

⁵⁴ Hibaw-i, kini mao lamang ang bugtong dapit nga ang kamatayon dili makabukbuk. Sa hapit na ang kamatayon moigo sa yuta, kinahanglan nga adunay usa ka dapit; tanan nga wala mailalum niini nangamatay. Bugtong usa ka dapit! Karon, wala kini magpasabot nga usa kadto ka balay; apan dihay usa ka dapit, nga niana ang nating carnero gipatay. Diin ang dugo sa nating carnero anaa niana, ang manulonda sa kamatayon dili makahimo sa paghampak niini, tungod kay kini mao ang usa ka dapit nga gibutangan sa Dios sa Iyang Ngalan. Ug kadtong nating carnero gihinganlan na sukad pa sa sinugdan, usa ka nating carnero. Hibaw-i, nga kadto mao ang usa ka dapit nga dili siya makahimo sa paghampak.

⁵⁵ Ug karon sama sa gihapon ning adlaw. Adunay usa lamang ka dapit nga ang espirituhanong kamatayon dili makahimo sa paghampak, kana mao ang Pulong. Ang kamatayon dili makahampak sa Pulong, tungod kay Kini mao ang buhing Pulong sa Dios.

Apan kong imong butangan ug mga kredo dinhi Niini, ang Pulong mobiya Mismo. Kini molain sama sa tubig ug sa lana. Dili mo kini mahimong sagulon. Busa, inyong makita, sa panahon nga ang kredo mosulod diha sa denominasyon, silang tanan mokuyog sa kredo; ug ang Pulong mamatay, ug moadto sa laing tawo ug mousbaw pa Kini ug dugang. Mopunit sa kusog sa lihok, maingon nga Kini mosubay gikan sa pagkamatarung, pagkabalaan, bautismo sa Espiritu Santo, ug padulong ngadto sa Liso! Nakita ba ninyo ang dalan nga giagian sa Dios? Pagdala sa Iyang Ngalan, sa tanan nga panahon, nagapadayon sa mao ra nga pamaagi, tungod kay Siya mao ang Pulong.

Hibaw-i, Kini dili mamatay. Ang Pulong sa Kinabuhi dili gayud mamatay.

⁵⁶ Hibaw-i kong unsa ka hingpit, karon. Ang manulonda sa kamatayon wala babagi sa paghampak sa mga bantugan ug manggialamong tawo sa Egipto. Wala kini babagi sa paghampak sa mga yuta niini nga bilihon, ang mga dagkung balay niini, ang ilang mga paraon. O, ang mga pari sa yuta, ang manulonda wala gayud babagi sa paghampak. Makahimo kini sa paghampak sa bisan asang balay, bisan unsang dapit, bisan kang kinsa, apan dili kini makahimo sa paghampak diin didto ang nating carnero.

Ang kamatayon dili makahimo sa paghampak diin kining gi-andam nga dapit sa Dios anaa, ug kana anaa diha sa Cordero.

⁵⁷ Hibaw-i, nga wala bisan pa ang...siya gibabagan sa paghampak sa Israel o sa mga sacerdoting Hebreohanon, ug, o bisan sa ilang denominasyon. Ang tanan kinahanglan anaa sa gipili sa Dios, inandam nga dapit, o moigo ang kamatayon.

⁵⁸ Iglesia, bisan kong hain ka, unsay imong gipasakopan, walay sapayan kini alang kanako. Apan, adunay usa lamang ka butang nga angay mong mahibaloan, kinahanglan nga maanaa ka kang Cristo o mamatay ka. Dili ka gayud mabuhì kong gawas Kaniya. Ang imong iglesia tingali'g maayo, maingon nga usa ka balay; ang imong panaghiusa tingali'g maayo, maingon nga tawo. Apan kong imong ilimod ang Lawas, ang Dugo, ang Pulong ni Jesu-Cristo, mamatay ka sa takna nga buhaton mo kini. Kini mao ang gipili sa Dios nga dapit sa pagsimba. Diha niini diin ang Iyang Ngalan anaa, husto kaayo. Diha niini diin maoy Iyang gipili aron ibutang ang Iyang Ngalan; dili diha sa simbahan, kondili diha sa Anak, si Jesu-Cristo.

⁵⁹ Hibaw-i, nga ang kasigurohan hikaplagn lamang diha sa dapit nga Iyang pagapilion, diha sa Iyang nating carnero, ug diha sa ngalan sa nating carnero.

⁶⁰ Hibaw-i, nga kini usa ka “lalake” nga carnero, usa ka lake, dili usa ka baye. Dili usa ka simbahan, babaye; kondili sa Iyang Ngalan, dili sa ngalan sa babaye. Diin Siya makigtagbo sa katawhan dili sa ngalan sa babaye, kondili sa Iyang Ngalan, Kaniya, ang Cordero!

⁶¹ Karon atong maingon, “Ang iglesia, ang bantugan, gamhanan nga iglesia, iyang gibuhat *kini* ug iyang gibuhat *kana*. Gidaug na niya ang mga bagyo. Kami miusbaw diha sa katawhan. Kami nabantog diha sa gidaghanon. Kami usa ka gamhanang iglesia. Siya mao ang bantugang butang.”

Apan ang Diyos wala maghigot ug bisan unsang butang bahin sa usa ka babaye. Siya miingon, “Kaniya.” “Kaniya,” anaa ang dapit nga tagbu-anan, ang Cordero, dili ang simbahan. Dili sa ngalan sa babaye, kondili sa Iyang Ngalan. Wala Niya ibutang ang ngalan sa babaye bisan diin. Iyang gibutang ang Iyang Ngalan diha “Kaniya”!

Mao kana ang hinungdan, “Ang tanan nga atong pagabuhaton, o sa pulong o sa buhat, pagabuhaton ta kining tanan sa Ngalan ni Jesu-Cristo.” Kong mag-ampo ta, kinahanglan nga maga-ampo ta sa Ngalan ni Jesus. Kong mangamuyo ta, mangayo ta sa Ngalan ni Jesus. Kong maglakaw ta, maglakaw ta sa Ngalan ni Jesus. Kong mosulti ta, mosulti ta sa Ngalan ni Jesus. Kong magabautismo ta, kinahanglan nga magbautismo ta sa Ngalan ni Jesu-Cristo. Tungod kay, “Tanan nga atong pagabuhaton sa pulong ug sa buhat, buhata kini sa Ngalan ni Jesu-Cristo.”

⁶² Usa ka tawo miingon kanako usa niana ka panahon, nga nakighigot niana, matud niya, “Igsoong Branham, ang akong asawa, dili ako . . .” Matud niya, “Siya, ang iyang ngalan mao si mao *Kana-ug-mao kadto*.” Siya usa ka ministro, tingali’g ania nagalingkod karon. Ug matud niya, “Ang akong asawa,” matud niya, “nagbaton siya sa akong ngalan.” Ingon ko lang nga si *Jones*, tungod dili kini si *Jones*. Matud niya, “Karon, dili na kinahanglan nga mobangon siya matag buntag, ug mokuha’g silhig ug moingon, ‘Karon silhigan ko ang salog sa ngalan ni *Jones*, ug akong hugasan ang mga plato sa ngalan ni *Jones*, ug manapak sa mga sinina sa ngalan ni *Jones*,’” Matud niya, “Wala sa akong paghuna-huna nga kinahanglan motawag ka pa sa bisan kinsang ngalan.”

Matud ko, “Nagtoo ako nga buhaton mo.” Husto kana.

Ug matud niya, “Bueno, ngano man? Dili kinahanglan nga isulti pa niya kini. Ang bisan unsang butang nga iyang gibuhat sa ngalan gayud ni *Jones*, sugod sa sinugdan.”

⁶³ Miingon ko, “Apan dili nga molakaw ka sa dalan ug kuhaon siya, ug moingon, ‘Dali ngari, *Jones*.’ Kinahanglan nga mahimo una, siya, pinaagi’g seremonyas, usa ka seremonyas sa kaminyoon, kang ‘*Jones*.’ Kay kong dili man siya, nan nag-ipon

kamo diha sa pagpanapaw. Ug kong magbautismo ka sa bisan unsa nga paagi nga dili sa Ngalan ni Jesu-Crsito, kini usa ka bautismo sa pagpanapaw, nga dili gayud hikaplagan diha sa Biblia.”

Ug unya, “Kong unsay imong pagabuhaton sa pulong ug sa buhat, buhata kining tanan sa Ngalan ni Jesus,” subay niana, kong unsa ang imong ginabuhat. Apan una sa tanan kinahanglan nga moduol ka sa Iyang Ngalan.

⁶⁴ Aniyay daghang mga maayong kababayen-an dinhi niining tigumanan karong gabhiona, maanyag, matinud-anong mga babaye; apan adunay usa lamang ka Mrs. William Branham. Siya mao ra ang usa nga mokuyog pauli uban kanako. Siya rang usa kana mao ang akong asawa.

⁶⁵ Adunay mga maayong tawo sa kalibutan, maayong mga kasimbahanan; apan adunay usa ra ka Misis Jesu-Cristo, ug mao kana ang Iyang pagabalikan. Mao kana ang gibutangan sa Iyang Ngalan. Diha niana ang Iyang pagsimba, diha Kaniya ng Kaniya lamang. Mao kana ang tinuod. Oh, oo, sir. Atong nahibaloan kana nga maoy tinuod.

⁶⁶ Karon, mao kana ang hinungdan, nga kita, “Tanan nga atong buhaton sa pulong o sa buhat, atong buhaton kini sa Ngalan ni Jesu-Cristo.”

“Walay laing ngalan nga gihatag sa ilalum sa Langit alang sa kaluwasan, gawas sa Ngalan ni Jesu-Cristo.” Mga Buhat, sa ika-2 nga capitulo, nag-ingon nga, “Kinahanglan mahibaloan ninyo. . .” “Ug walay laing ngalan nga gihatag sa ilalum sa Langit nga niini ang tawo maluwas, sa Ngalan lamang ni Jesu-Cristo.” Amen. Manghinaut ako nga nakuha ninyo kini. Sa Ngalan ni Jesu-Cristo, ang matag. . .

Ang Kahitas-ang Langit gitawag sa Iyang ngalan, “Ang matag-usa ka banay sa Langit gitawag sa ngalan ni Jesus,” nag-ingon ang Biblia, “ug ang tanan banay sa yuta gitawag sa ngalan ni Jesus.” Busa mao kana ang gipili sa Dios nga Ngalan ng dinhi niini Iyang gibutang Kini. Mao kana ang Iyang dapit sa pagsimba, anaa kang Jesu-Cristo. Karon, nasayud ta nga mao gayud kana, walay laing dapit sa pagsimba kondili Kaniya.

⁶⁷ “Kay wala nay lain pang ngalan sa silong sa Langit nga gihatag sa tawo, nga niini mamaluwas sila.” Siya ang Ngalan sa Dios sa pagtubos. Ang Dios adunay ngalan nga gitawag ug Jehovah-jireh, Jehovah-rahpa, Jehovah-jire. “Ang Ginoo mopasaylo sa tanan ninyong mga kasal-anan.” *Jehovah-rahpa*, “ang Ginoo magaayo sa tanan ninyong balati-an.” Siya adunay daghan mga titulo. Apan adunay usa lamang ka Ngalan Niya sa Pagtubos, kana alang sa katawhan, ug mao kana ang Ngalan ni “Jesus.” Mao kana ang Iyang Ngalan, nga Iyang gipili nga butangan. Diin kini Niya ibutang? Iya Kining gibutang diha kang Cristo.

⁶⁸ Ang tanan pang laing mga ngalan, mga kredo, mga titulo, makamatay ang pagsalig kanila. Nagsalig ka sa iglesia nga Metodista nga maoy modala kanimo ngadto sa Langit, siguro gayud nga mawala ka. Kong nagsalig ka sa Pentecostal, ang Pentecostal nga iglesia nga maoy modala kanimo ngadto sa Langit, mawala ka gayud. Ug ang Baptist, Lutheran, Presbyterian, Katoliko, ug uban pang iglesia; nagasalig ka sa ilang ngalan, o sa ilang titulo, o sa ilang kredo, mawala ka.

Tungod kay, dili ka man gani makasimba hangtud nga moduol ka una sa dapit sa pagsimba. Amen. Mao kana ang bugtong dapit nga ang Dios makigtagbo sa magsisimba, ang dapit nga Iyang gipili aron butangan sa Iyang Ngalan. Ang tanan pang uban, mosalig kamo diha kanila, mamatay kamo. Siya usab. . .

⁶⁹ Ania pay lain landong ni Jesus dinhi, akong gitiman-an, ang Kasulatan. Usab, Siya—Siya nagalarawan dinhi, “Siya kinahanglan nga walay ikasaway.” Ang dapit nga gibutangan Niya sa Iyang Ngalan, kining maong nating carnero kinahanglan nga walay ikasaway.

Karon, unsang denominasyon o pamaagi nga niini molaum kamo; unsa nga iglesia, Katoliko, Protestante, Hebreohanang, bisan unsa pa kini? Unsang sistema, denominasyon, nga mahimong inyong lauman, nga “walay ikasaway diha niini”? Kining tanan gisalikway, ug gidumili-an!

Apan adunay usa ka dapit! Aleluya! Kanang maong dapit anaa kang Jesu-Cristo. Walay usa ka ikasaway diha Kaniya. Diha Kaniya walay sayop.

Dili mo kalauman kini. Tanan kining mga katawhan nga naningkamot sa pagbuhat sa ingon, miingon nga ang ilang iglesia walay sayop ug *kining* tanan. Mahugaw kini, masinupakon sa Pulong, mga mahigugmaon, himalatyon, taga Laodicea, kredo, apan dili kini ang Kamatuoran. Apan bisan pa si Pilato nga iyang kaugalingon, ang Iyang kaaway, miingon, “Walay akong nakaplagan nga sayop diha Kaniya.” Ang Iyang Kaugalingon kaaway nagpamatuod nga walay sayop diha Kaniya. Dili mo mahimo ang pagtugsok ug bisan unsang sala diha Kaniya.

⁷⁰ Siya miingon ngadto sa mga pari sa Iyang mga adlaw, “Kinsa ba kaninyo ang makahimo Kanako sa pagpasangil nga adunay sala? Kinsay makapakita Kanako nga Ako makasala?”

Suginli ako sa usa ka iglesia nga makahimo sa pag-ingon nga sila walay butang nabuhat nga sayop. Sa walay lipod-lipod, walay bisan usa kanila, malisud, apan kong unsa ang pagpatay ug pagbuhat sa bisan unsang butang anaa na niining kalendaryo aron pagabuhaton, malisud. Human niana tawgon

pa gihapon ang ilang kaugalingon. . . Dili, kini dili ang dapit sa Dios nga tagbo-anan sa pagsimba, diha sa bisan unsang kredo o denominasyon.

⁷¹ Mga higala ko, dili ako gusto magpasakit ug pagbati, apan tulobagon ko ang usa ka Mensahe, ug, kanang maong Mensahe mao kini, “Gula dinhi niining kaguliyang!” Ug kong giingon ko kamo sa paggula, asa ko man kamo dad-a? Dad-on ko ba kamo ngadto sa Branham Tabernacle? Kini labi pang masalaypon sama usab sa uban kanila.

Apan adunay usa ka dapit nga mahimong dad-on ko kamo, diin niini kamo luwas ug gipanalipdan gikan sa kamatayon, kana anaa kang Jesu-Cristo. Mao kini ang dapit sa Dios sa pagsimba. Mao kana ang dapit nga akong gipaila-ila kaninyo, niining gabhiona, diin gibutang sa Dios ang Iyang Ngalan. Diin Siya nagsaad nga makigttagbo Siya sa matag tawo nga mosulod dinhi niini. Siya makigsimba uban kaniya ug makigpista uban kaniya, kana anaa kang Cristo; dili kon diha sa simbahan, dili sa tabernaculo.

Kondili, diha kang Cristo, Siya mao ang Tabernaculo sa Dios. Siya mao ang dapit nga gisudlan sa Dios, sa Iyang Kaugalingon, ug mipuyo diha sa sulod Niya. “Mao kini ang Akong Anak nga pinalangga, Kaniya nahimuot Ako sa pagpuyo.” Diha niini ang Dios magtabernaculo, gidala ang Iyang Ngalan ug gibutang Kini, diha kang Jesu-Cristo. Busa, ang Iyang Ngalan gibutang diha sa usa ka Tawo, Iyang Anak, Si Jesu Cristo, nga niini Siya nagtabernaculo sa Iyang Kaugalingon, ug diha nianang maong Tabernaculo.

Hain man, diha sa tipo, ang karaang Jerusalem, ang karaang mga pista, ang karaang templo, nga gihimong usa ka tipo; sa dihang mosulod ang aso, niadtong adlaw nga isulod ang arka, sa tugon, ug magpahiluna niini, ug ang Tingog sa Dios madungog gikan niini.

Tungod niini nadungog ang Tingog sa Dios, gikan sa Tabernaculo, si Jesu-Cristo; nga niini, ang Daan (natural) maoy usa ka tipo ug landong sa Bag-o. Ug sa Iyang pagsulod diha kang Cristo, Siya miingon, “Mao kini ang Akong Anak nga Pinalangga, nga Kaniya nahimuot Ako sa pagpuyo. Ug Ako ang magpili sa dapit nga Akong butangan sa Akong Ngalan, ug diin Ako makigttagbo sa tawo, ug kong diin Ako magasimba.” Ang Dios maoy nagpili sa dapit; dili sa denominasyon nga iglesia, kondili diha kang Jesu-Cristo. Oo, ginoo.

⁷² Kinahanglan usab Siya nga “walay ikasaway,” sumala sa gikaingon ko na. Walay denominasyon nga makapangangkon niana. Gibuhat kini nila; mga anti-cristo sila.

⁷³ Karon atong hingkaplagan dinhi, hibaw-i ang Iyang landong pag-usab. Ang—ang nating carnero kinahanglan nga pagatipigan. Karon, kini hikaplagan diha sa Exodus 12, kong

inyong gitiman-an kini, Exodus 12:3 hangtud sa 6. Ang nating carnero kinahanglan nga pagatipigan ug upat ka adlaw, aron pagasusihon, aron tan-awon kong kini takus ba sa pag-adto sa halaran. Kinahanglan pagakuhaon, susihon gayud pag-ayo, sulod sa upat ka adlaw, aron tan-awon kong may ikasaway ba diha niini, tan-awon kong may sakit ba kini, tan-awon kong may butang ba nga dili maayo diha sa nating carnero. Kinahanglan nga kini pagatipigan ug upat ka adlaw.

⁷⁴ Karon hibaw-i. Tingali ang uban kaninyo adunay hunahuna nga kana mubo ra kaayo, nga pagapatyon sa ika-napulo'g upat. Ed Apan, nahinumdom ba kamo, nga ilang kuhaon ang nating carnero sa ika-napulo ka adlaw sa bulan, ug patyon kini sa ika-napulog upat ka adlaw sa bulan, tan-awa, nga gitipigan sulod sa upat ka adlaw.

⁷⁵ Karon, si Jesus, ang Ngalan sa Dios, Cordero, miadto ngadto sa Jerusalem ug wala na magpakita pa pag-usab hangtud sa pagkatapus sa Iyang kamatayon, paglubong, ug pagkabanhaw. Siya ginatipigan ilalum sa mga mabiy-biayon sulod sa upat ka adlaw ug upat ka gabii. Unsang pagkahingpit nga tipo niadtong Cordero, nga gitipigan sulod sa upat ka adlaw. Mao kadto ang gi-ingon ni Pilato, "Walay akong hingkaplagan nga sayop diha Kaniya."

⁷⁶ Lain pang landong diha Kaniya, walay bukog nga mahimong dugmokon diha Kaniya, nga maoy hingpit, nga niini walay ilang nahimo. Kong ang halad patyon na, dili nila pagabalion ang bukog. Kong bali man kini, dili kini dawaton. Ug nakuha na nila ang martelyo pagbalik aron idugmok sa mga bukog sa mga bitiis ni Cristo, sa ilang pag-ingon, nga "Patay na Siya." Ilang gidughang ang Iyang kilid ug nakakita'g Dugo ug tubig.

⁷⁷ Hibaw-i pag-usab ang lain dakung butang dinhi. Dili ko kini laktawan, tungod kay Siya ang naglarawan diha sa mga halad, ang halad nga kalan-on.

Akong nahinumduman usa niana ka panahon nga sila adunay usa ka tulonghaan, diha sa Biblia, gitawag nga tulonghaan sa mga propeta, ug kadto usa gayud ka tulonghaan. Ug atong nasayran nga si Elias mitungas didto niadtong maong tulonghaan usa niana ka adlaw, ug miingon sila, "Kami. . ." Mihangyo sila kaniya sa pagpahawa, nga nag-ingon, "Kong ania ka dinhi, ang mga butang labihan ra ka tulid." Busa buut nila siya papahawa-on.

Ug miadto sila sa gawas aron andaman siya ug panihapon. Ug ang panon sa mga pari miadto sa gawas, o mga propeta, aron magkuha ug mga balatong, aron mag-andam ug panihapon alang kaniya. Ug samtang ilang giandan, nakadala sila ug usa ka dakung sudlanan nga napuno; ug sa ilang paghibalik, kadto mga ihalas nga tabayag, nga makahilo, ug

ilang gi-itsa ngadto sa kolon. Ug ang kolon misugod na sa pagbukal, ug sila, adunay usa, nga miingon, “Anugon, kay adunay kamatayon diha sa kolon. Karon bisan kita dili na makaka-on.”

Ug miingon si Elias, “Dad-i ako ug usa ka kumkum nga harina.” Ug iyang gikuha ang harina ug giitsa kini ngadto sa kolon, ug miingon, “Ka-on na. Ang kolon naayo na.”

⁷⁸ Ang halad nga kalan-on mao si Cristo. Ang matag dugmok kinahanglan nga managsamang ipahimutang, ug ang matag gagmay'ng tipik sa harina kinahanglan nga parihas ang pag-galing, alang sa halad nga kalan-on. Naglarawan, nga, Siya mao ang mananambal. Iyang giilisan, ug gikuha ang kamatayon, ug gipulihan ug Kinabuhi; pinaagi'g duha ka mga balaod. Aleluya! Nga diin ang kamatayon, usa ra ka dapit; sa dihang si Cristo mosulod, ang Kinabuhi mosulod. Siya mao sa gihapon kagahapon, karon, ug sa palaaboton. Ug diin anaay kamatayon, didto mahimo ang Kinabuhi, tungod kay kanang Cristo gipasulod, ang halad nga kalan-on.

⁷⁹ Unsa ka dakung pagtulon-an ang mahimo niining mga butanga kong atong hatagan ug panahon nga mabahin-bahin sila! Karon hibaw-i, nga walay usa ka pulong sa landong nga napakyas. Walay usa ka pulong sukad napakyas, diha sa landong. Ang tanan butang gitipo sa tukma gayud.

Siya mao ang gipili sa Dios nga dapit sa pagsimba, ug ang Ngalan sa Dios gihatag ngadto Kaniya. Siya mao ang dapit sa Dios sa pagsimba, ug ang Ngalan sa Dios gihatag ngadto Kaniya. Siya mao ang Pulong sa Dios, ug Siya mao ang Ngalan sa Dios. Siya mao ang Pulong sa Dios ug usab ang Ngalan sa Dios. “Siya mao ang Pulong nga nahimong unod.” Siya mao ang Pulong sa Dios, Cordero sa Dios, Ngalan sa Dios, ug mao ang Dios. Ingon niana Siya, ang pinili ug ang bugtong dapit sa pagsimba ngadto sa Dios.

⁸⁰ Ug gisalikway sa Dios ang bisan asang dapit gawas kang Jesus Cristo; dili ka makahimo sa pagsimba Kaniya bisag asa. Siya miingon, “Kawang lamang ang ilang pagsimba Kanako, kay ilang gipaka Doctrina ang mga kasugoan nga iya sa tawo.” Karon adunay atong mga kredo, mga dogma, ug tanan pang butang, nga nagatudlo nga mao *kini* ang paagi ug mao *kana* ang paagi.

Ug si Jesus miingon, “Ako mao ang Dalan, ang Kamatuoran, ug ang Kinabuhi, ug walay usa nga makaadto sa Dios gawas kon pinaagi Kanako.” Sa laing pagkasulti, “Ako mao ang Pultahan sa toril. Tanan nga anaa sa gawas mga tulisan.” Siya maoy bugtong maduolan. Siya mao ang Pultahan. Siya mao ang Dalan, ang Kamatuoran, ang Kinabuhi, tanan nga diha niana; ang bugtong alagianan, ang bugtong dapit, ang bugtong pagsimba, ang bugtong Ngalan.

Ang matag butang nahigut kang Jesu-Cristo. Tanan sa Daan Tugon nahigut ngadto Kaniya. Ang Bag-ong Tugon nahigut ngadto Kaniya. Ug ang Iglesia karon nahigut ngadto Kaniya, pinaagi sa Pulong sa Iyang kasugoan. Wala nay lain pang dapit, o lain pang Ngalan, o bisan asa, diin ang Dios nagsaad gayud sa pagpakigttagbo sa tawo; diha lamang kang Jesu-Cristo, ang Iyang dapit nga gipili sa pagsimba.

⁸¹ Hibaw-i, nga ang Dios adunay saad sa pagpakigttagbo sa Iyang magsisimba diha lamang sa usa ka dapit, ug kana diha sa Iyang Kaugalingong pagpili; dili sa atong pagpili, dili sa atong pagpanghuna-huna; kondili sa Iyang panghuna-huna, sa Iyang pagpili. Ug kini mao ang dapit diin Iyang gibutang ang Iyang Ngalan, nga Iyang gipili. Busa atong nasayran nga atong hingkaplagan kong diin ang Iyang Ngalan, unsay Iyang gipili, pinaagi sa Iyang Kaugalingon pagpili.

⁸² Karon nga hingkaplagan na nato ang dapit nga gibutangan sa Iyang Ngalan, nga diha, kang Cristo Jesus, ug wala nay laing dapit, o wala nay laing ngalan, natagbaw ba kamo niana? Moingon nga, “Amen.” (Ang Kongregasyon miingon, “Amen.”—Ed.) Karon, ang butang niini mao, kong atong hingkaplagan kong hain ang dapit... Ang dapit nga pasimbahan dili sa bisan asa pagadawaton, diha lamang gayud kang Cristo.

Makahimo ka sa paghinulsol, makahimo ka niana, apan wala ka pa gayud makasimba. Nangayo kag kapasayloan. Si Pedro miingon...

Sa Adlaw sa Pentecostes, sa nakita nila silang tanan nga nagsulti'g laing mga pinulongan, ug ang mga dagkung ilhanan ug mga katingalahan nagakahitabo, sila misugod sa pagpangatawa, ang iglesia miduyog usab, ug miingon, “Kining mga tawhana nangabasdak sa bag-ong bino. Ang ilang mga linihokan sama sa hubog nga katawhan. Ang...” Si Maria nga ulay, silang tanan, nagakatigum, usa ka gatus ug kaluhaan sila. Ug nagasamparay sila sama sa tawong hubog, ug nagsulti'g laing pinulongan, ug nagapadayon. Matud nila, “Kining mga tawhana nangabasdak sa bag-ong bino.”

⁸³ Apan si Pedro, mitindog, ug miingon, “Mga katawhan ug mga kaigsoonan, kining mga tawhana wala mabasdak sa bag-ong bino, sanglit karon ikasiyam pa man lamang ang takna sa kabuntagon. Apan kini mao ang giingon sa propeta nga si Joel, ‘Ug mahitabo sa kaulahiing mga adlaw, naga-ingon ang Dios, nga pagabobuan Ko sa Akong Espiritu ang tanang katawhan; ug magahimog profesiya ang inyong mga anak nga lalake ug babaye; ang Akong mga alagad nga babaye ug suloguong babaye pagabobuan Ko sa Akong Espiritu. Ipasundayag Ko ang mga katingalahan sa itaas diha sa kalangitan, ug diha sa yuta; kalayo, mga haligi nga kalayo, mga gabon nga aso. Kini

mahitabo, sa dili pa ang daku ug makalilisang nga Adlaw sa Ginoo moabot, nga si bisan kinsa ang magatawag sa Ngalan sa Ginoo mamaluwas.”

⁸⁴ Ug sa ilang pagkadungog niini, gisakitan sila sa kasing-kasing, ug miingon, “Mga igsoon, unsa may among pagabuhaton?”

⁸⁵ Ug si Pedro mitubag, “Maghinulsol, ang matag usa kaninyo, ug magpabautismo sa Ngalan ni Jesu-Cristo alang sa kapasayloan sa inyong mga sala, ug inyong madawat ang gasa nga Espiritu Santo. Tungod kay ang saad alang niadtong umalabot pa nga mga kaliwatan.” Karon atong hingkaplagan kana.

⁸⁶ Karon atong pangitaon kong unsaon nato *pagduol* Kaniya. Unsaon man nato sa pagduol dinhi niining dapit sa pagsimba? Ang Unang Mga taga Corinto 12 maoy tubag niini, kay, “Pinaagi sa usa ka Espiritu!” Dili pinaagi sa usa ka simbahan, dili pinaagi sa usa ka kredo, dili pinaagi sa usa pastor, dili pinaagi sa usa ka obispo, dili pinaagi sa usa ka pari. Kondili, “Pinaagi sa usa ka Espiritu Santo kitang tanan nabautismohan diha sa usa ka Lawas,” nga mao ang Lawas ni Jesu-Cristo, ug nagapailalum ngadto sa matag gasa nga gikapahimutang diha sa Lawas, Oo, ginoo! Dili sa pagpasakop, dili sa pagsag-ulo sa mga kredo, dili sa pagpataas-taas, pulo paubos, sa paglamanohay, ug wala nay lain pa. Kondili, pinaagi sa Pagkahimugso kita gibautismohan diha sa Lawas ni Jesu-Cristo! Amen. “Pinaagi sa usa ka Espiritu Santo kitang tanan gibautismohan diha sa usa ka Lawas.”

⁸⁷ Ug unsa kanang Lawasa? “Sa sinugdanan mao ang Pulong, ug ang Pulong kauban sa Dios, ug ang Pulong mao ang Dios. Ug ang Pulong nahimong unod ug nagpuyo uban kanato.” Unsaon man nato pagkaapil nato nianang Lawasa ug atong isalikway ang usa Pulong Niini, o ibutang Kini kay layo bisag-asa nga Kini dili gani sulod sa iyong Lawas? Unsaon man nato paghabuhat niini? Ang pinili sa Dios nga Dapit!

⁸⁸ Hibaw-i, nga kong sa tinud-anay gibautismohan ka diha Kaniya, ang tinuod nga ilhanan nga ikaw mituo Kaniya, ang Pulong.

Unsaon man nimo sa pagkahimong bahin Kaniya ug unya ilimod mo Siya? Unsaon man nako sa paglimod sa akong kamot maingon nga akong kamot? Kong diha . . . Kong buhaton ko, adunay dili maayong pangisip nga ania kanako. Ug unsaon man nako? Kong aduna may dili maayong pangisip kanako, nga ilimod nga kana akong kamot, nga ilimod nga kana akong tiil, nan adunay espirituhanong sayop sa magtutoo nga naglimod sa bisan unsang Pulong nga gisulti sa Dios ug gisaad. Adunay usa ka butang nga espirituhanong sayop nianang gitawag nga kono magtutoo.

⁸⁹ Dili mo mahimo ang paglimod sa usa ka titik Kaniya, tungod kay ikaw nahimo na man nga kabahin sa ingon. Ikaw kabahin Kaniya tungod kay gibautismohan ka man diha Kaniya; pinaagi, sa Espiritu Santo nga nagdala kanimo diha sa Lawas ni Jesu-Cristo. Unsa ka nindot nga butang!

⁹⁰ Ang Dios adunay usa ka tinuod dapit nga Iyang tagbuon— Iyang tagbuon si Abraham, ug didto si Abraham misimba. Tanan hangtud ngadto sa Kasulatan!

Ug ang Iyang Pulong nga gisaad pagahubaron diha kaninyo, pinaagi Kaniya. Nasabtan ba ninyo kana? Ang Pulong nga Iyang gisaad nga tumanon diha sa panahon nga inyong gipuy-an, kamo mahimong usa ka sinulat nga basahon sa Dios, nga pagabasahon sa tanang tawo. Dili sa kong unsa ang imong giangkong, kondili kong unsay gibuhad sa Dios pinaagi kanimo, maoy mosulti ug kusog kay sa bisan unsang butang nga mahimong giangkong mo. Ang Dios nag-ingon, “Kining mga ilhanan maganunot kanila nga nagatoo.” Kana maoy magasulti pinaagi kaninyo.

⁹¹ Siya misulti niining panahona, unsa man ang mahitabo karon. Ang mga magtotoo niining panahona kinahanglan motoo Niini, kong unsay Iyang gisaad karon. Managsama ra maingon sa ilang pagsulod sa arka, aron nga maluwas; nga migula gikan sa Egipto aron maluwas; sila kinahanglan nga moduol kang Cristo, aron nga maluwas karon, sa Pulong nga Mensahe, nga Siya mao sa gihapon kagahapon, karon, ug sa palaabotan.

⁹² Giunsa nimo sa pagpakasulod diha Niini? Pinaagi bautismo! Bautismo sa unsa, sa tubig? Pinaagi sa Espiritu Santo! “Sa Usa ka Espiritu, kitang tanan gibautismohan diha sa usa ka Lawas.”

⁹³ Ug ang Iyang gisaad nga Pulong, dili Niya... Dili na kinahanglan nga hubaron mo pa Kini. Siya maoy mohubad Niini pinaagi kanimo; kong unsay imong ginabuhad, kong unsay Iyang gisaad nga pagabuhaton. Ang Iglesia nga nagasunod Kaniya mahisama gayod Kaniya hangtud nga ang katawhan mahibalo.

Tan-awa si Pedro ug si Juan sa dihang gipangutana sila mahitungod sa pagkaayo sa usa ka lalake didto sa pultahan nga gitawag nga Matahum. Matud nila, “Ilang nasabot,” niadtong mga pari, “nga sila nga walay hingkaton-an ug tawong walay nahibaloan,” apan ilang namatikdan nga sila niadto kauban ni Jesus. Tungod kay, (unsa?) nagabuhad sila sa mga butang nga Iyang gibuhad.

⁹⁴ Siya kinahanglan nga magabuhad sa bulohaton sa Amahan. Ug karon kinahanglan nga mao ra sa gihapon.

⁹⁵ Karon, hinumdumi, Siya mao sa gihapon kagahapon, karon, ug sa palaabotan; tungod kay ang Dios makigtagbo

kanimo diha Kaniya, ang bugtong nga maong dapit; tungod kay kana maoy Iyang gipili aron butangan sa Iyang Ngalan, diha kang Jesus. Si “Jesus” mao ang Ngalan sa Dios. Hinumdumi, nga ang Amahan, Anak, Espiritu Santo, maoy mga titulo sa Ngalan nga “Jesu-Cristo.”

⁹⁶ Sa pag-ingon ni Mateo, “Busa panglakaw kamo, ug tudlo-i ang tanan kanasuran, sa pagpamautismo kanila diha sa Ngalan sa Amahan, sa Anak, ug sa Espiritu Santo.”

Giunsa man kini sa pagtuis karon, ug moingon, “Sa ngalan sa Amahan, ngalan sa Anak, ngalan sa Espiritu Santo.” Wala man gani kini mahisulat. Kini, “Diha sa Ngalan,” usa ra, “sa Amahan, Anak, Espiritu Santo.” Ang *Amahan* dili usa ka ngalan, ang *Anak* dili usa ka ngalan, ang *Espiritu Santo* dili usa ka ngalan; kini usa ka titulo.

Sa paghilabay sa napulo ka adlaw, si Pedro mitindog ug miingon, “Paghinulsol, kamo, ug pabautismo ang matag-usa kaninyo sa Ngalan ni Jesu-Cristo.” Unya gibuhat ba niya ang giingon Niya nga dili niya pagabuhaton? Iyang gibuhat kung unsay Iyang giingon kaniya nga pagabuhaton. Ang Ngalan sa Amahan, Anak, ug Espiritu Santo mao “si Ginoong Jesu-Cristo.” Ang matag tawo diha sa Bag-ong Tugon gibautismohan sa Ngalan ni Ginoong Jesu-Cristo.

⁹⁷ Walay usa ka tawo diha sa Biblia sukad nga gibautismohan diha sa mga titulo sa Amahan, Anak, Espiritu Santo. Kana wala gayud sukad motumaw hangtud nga ang kredo sa Nicaea gigamit diha sa Nicaea, sa Roma. Usa kadto ka mando sa simbahang Katoliko, hingkaplagnan, nga gipamatud-an sa mao rang butang, diha sa catekismo. Anaay ako niini, husto kana, *Mga Kamatuuran Sa Atong Pagtoo*, ug uban pa, nga mao kana gayud ang kredo sa Simbahang Katoliko. Sultihan ka nila nga wala kini sa Biblia; apan moingon sila nga sila adunay gahum sa pag-usab niadtong mga Pulong, kong maoy ilang gusto, tungod sa papa. Lahi ko.

Si Jesu-Cristo mao sa gihapon kagahapon, karon, ug sa palaabotan. “Ug si bisan kinsa nga magakuha ug usa ka Pulong gikan niining Biblia,” matud ni Jesus, “o magadugang ug usa ka pulong dinhi Niini, ang iyang bahin pagakuhaan gikan sa Libro sa Kinabuhi.” Usa ka Pulong; dili kong usa ka han-ay sa mga pulong, o usa ka parapo, kondili usa ka Pulong! “Ang si bisan kinsa nga magaiban ug usa ka Pulong. . . .”

⁹⁸ Sa sinugdan, gilig-on sa Dios ang Iyang katawhan uban sa Iyang Pulong. Usa ka Pulong, nga gisayop sa pagsabot, nahimong hinungdan sa matag kamatayon, matag sakit sa kasing-kasing, matag kagul-anan. Si Eva, wala niya supaka ang usa ka han-ay sa pulong; usa lang ka Pulong ang gisupak niya. Sa pag-abot ni Jesus diha sa tunga-tunga sa Basahon. . . . Mao kadto ang sinugdanan sa Libro.

Sa pag-abot ni Jesus sa tunga-tunga sa Basahon, unsay Iyang giingon? “Nahisulat kini nga ang tawo dili mabuhi sa tinapay lamang, kondili sa matag Pulong nga magagula gikan sa baba sa Dios.”

Diha sa katapusan sa Libro, Pinadayag sa ika-22 nga capitulo, sa ika-18 nga bersiculo, sa katapusang bahin sa Biblia, si Jesus Mismo ang nagsulti, nga nag-ingon, “Akong pamatud-an nga kong adunay tawo nga maga-iban ug usa ka Pulong gikan niining maong Libro, o magadugang ug usa ka pulong dinhi Niini, ang iyang bahin pagakuhaan gikan sa Basahon sa Kinabuhi,” tungod kay siya usa ka mini nga propeta ug maoy nagpasayup sa panabot sa katawhan, ug ang ilang dugo pagapaninglon diha sa iyang kamot, tungod sa pagbuhat sa ingon.

⁹⁹ Kinahanglan nga atong ampingan kanang usa ka dapit sa pagsimba, nga mao, si Jesu-Cristo ang Pulong, nga mao sa gihapon kagahapon, karon, ug sa palaaboton. Amen. Padayonon ta. Hinumdumi, walay laing dapit nga tagbo-anan sa pagsimba, dili usa ka dapit. Dios ang nagpili Niini.

¹⁰⁰ Si Juan, mobalik ta didto sa nagsumpay sa Bag-o ug sa Daan Tugon. Paminaw pag-ayo karon. Hibaw-i pag-ayo. Si Juan, kadtong bantugang agila, miabot nga naglupad gikan sa kamingawan usa niana ka adlaw, ang iyang kugan nga mga pako gibukhad. Siya milugsong diha sa pang-pang sa Jordan, usa ka bantugang agilang propeta nga maoy nagtulay sa taliwala sa Daan ug Bag-ong Tugon, ug iyang gitawag sila gikan sa tuo ug usa ka wala. Siya nagatawag ug usa ka adlaw sa paghinulsol.

Diin nanu-ol ang mga Fariseo ug mga Saduceo; siya miingon, “Ayaw kamo pagsugod sa pag-ingon sa inyong kaugalingon, ‘Anaa si Abraham nga among amahan,’ tungod kay sultihan ko kamo nga ang Dios makahimo sa pagpatindog niining mga bato nga mahimong mga anak ni Abraham.” Oh, my!

Sa gisugdan na niya pag-itsa ang iyang Maayong Balita, ug nagaingon, “Adunay Usa nga nagabarog sa taliwala ninyo, kang Kinsa wala kamo makaila. Wala pa nako Siya mailhe, apan mailhan ko Siya kong moabot na Siya. Dili gani ako takus sa pagtangtang sa Iyang sandalyas. Apan Siya maoy magabautismo kaninyo pinaagi sa Espiritu Santo ug Kalayo. Ug ang Iyang paliran anaa na sa Iyang mga kamot; Iyang pagahinlo-an pag-ayo ang Iyang giokan, ug Iyang pagasunogon ang mga uhot uban sa Kalayo nga dili arang mapalong.”

¹⁰¹ Kadtong bantugang Maayong Balita nga agila nga naglingkod didto, samtang iyang gipundok ang iyang dagkung mga paghagit. Ug ang kahugaw migawas, o si Herodes, ang

emperador niadtong panahona, tigpahibalo, nangasawa sa asawa sa iyang igsoon. Ug napamalandong ba ninyo kadtong bantugang agila sa Maayong Balita nga naglingkod didto ug wala mahadlok diha niana?

Ang kadaghan kanila miingon, “Ayaw’g iwali ang kasal ug diborsyo karon, Juan; kay anaa naglingkod si Herodes.”

¹⁰² Milakaw siya padulong sa iyang atubangan ug miingon, “Dili uyon sa balaod alang kanimo nga mangasawa kaniya.” Husto!

Unsa, siya, kadto? Siya mao kadtong agila nga nagagikan sa kamingawan. Wala siya mabansay sa ilalum sa tawhonong kalisang ug mga panghulga, sa uban nga denominasyon. Kondili nabansay siya ubos sa Gahum sa Dios nga labing makagagahum, aron sa pagkahibalo kong unsay magakahitabo didto. Nahibalo siya sa ilhanan sa Mesias.

Aleluya! Ang pulong nga nagkahulogan, “Dayega ang atong Dios!” Ayaw’g kahadlok. Wala pay akong napasakitan nga tawo. Wala akoy kahadlok. Nahibalo ako sa husto kong hain ako.

Oh, kong pamalandungon ko siya, kadtong bantugang agila nga nagalupad didto sa gawas ug unya milingkod! Matud niya, “Makaila ako Kaniya kong moabot na Siya.”

¹⁰³ Usa niadto ka adlaw nagtindog siya didto, nga nagwali. Ang mga pari didto sa pikas daplin, miingon, “Ang buot mo bang ipasabot nga adunay panahon nga moabot nga ang inadlaw-adlaw nga halad pagakuhaon na; kining dakung templo nga among binuhat, ug ang tanang mga buhat nga among gipahimutang, kami nga dakung denominasyon?”

Siya miingon, “Moabot ang panahon nga kanang tanan igahikling ra.”

“Kini maoy dili mahimo. Ikaw usa ka mini nga propeta!”

¹⁰⁴ Ug mitan-aw siya sa palibot. Siya miingon, “Tan-awa, anaa ra Siya! Mao kana ang gipili sa Dios nga dapit sa pagsimba. Mao kana ang Cordero, ang tinuod nga Cordero nga magakuha sa sala sa kalibutan.” Wala siya miingon, “Ania na ang Metodista, ania na ang Baptist, o ang Katoliko.” Siya miingon, “Ania miabot na ang Cordero sa Dios nga magakuha sa sala sa kalibutan.”

Ang bugtong dapit nga adunay kasigurohan diha niini anaa nianang Cordero sa Dios. Diha lamang Kaniya ang kaluwasan; dili sa bisan unsang simbahan, bisan unsang kredo, bisan unsang katawhan, bisan unsang amahan, inahan, bisan unsang balaang tawo, o wala na, balaang dapit. Kini anaa sa Balaang Dios, sa Ginoong Jesu-Cristo, diin sa Dios gibutang ang Iyang Ngalan diha sa Tawo, aron sa pagtubos, Kinsa maoy

mibayad sa bili alang kanatong mga makakasasala. Mao lamang kana ang bugtong dapit nga anaay kaluwasan. Mao kana ang Bato nga akong gibarugan.

¹⁰⁵ Nakaila si Juan Kaniya. Miingon siya, “Wala ko Siya hiilhi sa dihang nakita ko Siya nga miabot nga naglakaw, apan didto nako nakuha ang akong natun-an. . .” Dili sa seminaryo sama sa gibuhat sa iyang amahan; dili sama sa pari, nga binansay. Kondili didto sa kamingawan, diin siya anaa sa Teolohikanong seminaryo sa Dios nga Labing Makagagahum, nga nagapaabot sa Pulong sa Dios; dili kong sa unsay gipiso sa ubang pundok sa tawo, kondili nga kong unsay giingon sa Dios mahitungod Niini. Ug sa paghangad ni Juan sa itaas ug nakita ang Espiritu nga mikunsad, siya miingon, “Akong pamatud-an, nga mao kini Siya.” Oh, my!

Mao kana ang inyong dapit sa pagsimba. Mao kana ang inyong dapit nga tagu-anan. Mao kana ang Cordero sa Dios nga magakuha sa sala sa kalibutan. Dili simbahan, dili kredo, o wala nay lain pa, kondili ang Cordero sa Dios nga magakuha sa sala sa kalibutan.

¹⁰⁶ Tan-awa kong giunsa ni Juan sa pagpahimutang niini? Wala siya moingon, “Kamong mga Fariseo maoy husto, kamong mga Saduceo, mga maka-Herodes.” Siya miingon, “Kana mao ang Cordero.” Mao kana ang dapit. Anaa Kaniya ang Ngalan. Siya kadtong Usa. Wala nay lain Ngalan sa silong sa Langit!

¹⁰⁷ Bantayi kong unsay giingon ni Jesus mahitungod kang Juan karon. Usa niana ka adlaw si Juan nagpadala ngadto Kaniya, aron sa pagtan-aw kong unsay Iyang ginabuhat. Si Jesus miingon alang kaniya, “Siya mao kadtong daku ug nagadan-ag nga kahayag,” aron sa pagpakita kanila sa hustong dalan nga ilang pagasundon sa dili pa ang Iyang pag-abot, ang Iyang unang pag-anhi. Paminaw ug maayo. Ayaw’g pakyasa kini. Si Jesus miingon, “Si Juan mao kadtong kahayag.” Malaquias 3, walay sayop! Ang propeta uban sa dakung kahayag nga nagadan-ag nagpaila kang Jesus nga maoy bugtong Usa, “ang Cordero.” Ang tanan pang lain mga carnero nga gihisgotan sa mga pari, ug ang tanan nilang laing butang, mga binuang. Ania “ang Cordero!” Ang tawo nga inubanan sa dakung dan-ag sa kahayag, nga maoy giingon ni Jesus nga siya.

Ang Malaquias 3 nag-ingon, “Akong ipadala ang Akong mensahero sa atubangan Ko aron sa pag-andam sa alagianan.” Ug ang usa gipadala aron sa pag-andam sa dalan, miila Kaniya nga mao ang dapit. “Mao kana Siya! Walay sayop. Mao kana Siya! Akong nakita ang ilhanan nga nagsunod Kaniya. Nahibalo ako nga mao kana Siya; usa ka Kahayag nga mikunsad gikan sa Langit ug mitongtong sa ibabaw Niya.” Dili kini malalis, mao kana Siya.

¹⁰⁸ Unya, akong igsoon ko, buot kong mangutana kaninyo'g usa ka butang, sa pagtapus. Tingali'g moingon kita niini. Sa Malaquias 4, wala ba usab kita saari ug lain pang agila, usa ka Haligi nga Kahayag nga magasunod, aron sa pagtultol sa masalaypon nga iglesia niining adlaw nga Siya mao ang Hebreohanon 13:8, “mao sa gihapon kagahapon, karon, ug sa palaaboton”? Wala ba kita saari ug lain pang usa nga magaabot maglupad gikan sa kamingawan? Amen! Kana mao gayud ang Kamatuoran. Unsa ka sibo gayud ug takdo kini diha sa Lucas 17:30, diin ang Anak sa tawo (Agila) magapadayag sa Iyang Kaugalingon aron himoong kawang ang tanan pang mga dapit nga simbahanan, sama sa denominasyon ug uban pa!

Ang Dios nagpili sa Iyang dapit. Si Juan miingon, “Anaa ra Kini!”

¹⁰⁹ Ug unya gisaaran ta sa samang butang dinhi niining adlaw, Malaquias 4, “Aron sa pagpabalik sa kasing-kasing sa mga anak,” aron sa pag-ingon nga Siya dili patay, kining mga butanga dili alang sa lain nga kapanahonan; ang bautismo sa Ngalan ni Jesus' dili alang lamang sa kaniadto, kondili Siya karon mao sa gihapon. Amen. Aron nga mahimong kawang ang tanan mga dapit sa pagsimba, mao kana ang pagabuhaton sa agila sa katapusang panahon, aron sa pagpakita nga ang tanan pang nahibilin niini maoy mga binuang, ang denominasyon binuang, kondili aron itudlo kanila pag-usab nga dinuyogan sa mao ra nga ilhanan nga iyang gibuhat, nga Siya mao sa gihapon kagahapon, karon, ug sa palaabotan. Aleluya!

¹¹⁰ Ug usab, diha sa Pinadayag 4:7, adunay atong upat ka mga Mananap nga sa dili pa lamang dugay nakatapus kita niini.

Ang nahauna mao, nga atong hingkaplagan, ang leon. Mao kadto ang unang Mananap nga migula aron atubangon ang hagit niadtong adlaw, ang Leon sa Banay ni Juda.

Human Kaniya miabot ang sunod nga Mananap. Ug atong hingkaplagan, nga ang sunod nga Mananap mao ang baka, nga mao ang mananap alang sa lulan, usa ka halad. Sa mga adlaw sa mga Romanhong simbahan, ang Iglesia namatay; gihalad.

Ang sunod nga miabot, mao ang tawo, mao ang usa ka Mananap nga adunay dagway sa tawo. Ug kadtong tawo mao kadtong mga reformador, edukasyon sa tawo, teolohiya, ug uban pa.

Apan ang katapusang Mananap nga mao kadtong molupad, ang katapusang Mananap nga taliabot, ang Biblia nag-ingon nga kini mao ang nagalupad nga agila. Aleluya! Ug ang propeta nag-ingon nga, niining adlaw, “Kini mahimong Kahayag.” Oh, na! “Niadtong adlaw maanay Kahayag.”

¹¹¹ Dihay usa ka adlaw sa mga reformador. Dihay usa ka adlaw nga ingon lang sa usa ka landong, dili matawag nga adlaw o gabii. Apan sa panahon sa kagabhion, sa panahon sa Agila:

Maana-ay Kahayag sa tukmang panahon sa
 Agila,
 Ang agi-anan paingon sa Himaya imo gayong
 makaplagan;
 Sa agi-anan sa tubig mao ang Kahayag karon,
 Nga gilubong sa bililhong Ngalan ni Jesus.
 Mga batan-on ug mga tiguwang, maghinulsol
 kamo sa tanan ninyong mga sala,
 Ang Espiritu Santo mao gayo'y mobautismo
 kanimo pasulod;
 Tungod kay ang Kahayag sa kagabhion
 miabot,
 Kini mao ang tinuod nga ang Dios ug si Cristo
 Usa ra.

¹¹² Amen! Kini mamahimong Kahayag sa panahon sa kagabhion, ang bugtong pinili sa Dios nga dapit sa pagsimba. Oh, unsa man kining nahibalik nga Mensahe, unsa man ang Iyang pagabuhaton? Ug sa iyang adlaw kini mahimong Kahayag sa panahon sa kagabhion, ug (unsa?) aron sa pag-abi-abi sa Iyang mga anak balik sa matuod nga Yuta sa saad, pinaagi sa mao ra nga ilhanan ang Haligi nga Kalayo nga maoy naga-una sa mga anak sa Israel latas sa kamingawan.

Ang gipili sa Dios nga dapit sa pagsimba, si Jesu-Cristo. Mao kana ang bugtong dapit nga anaa diha. Mao kana ang bugtong Ngalan nga gihatag sa Dios alang sa kaluwasan. Mao kana nga Iyang gitawag sa ngalan ang banay sa Langit, sa diha nga kini ania sa yuta, mao si Jesu-Cristo.

¹¹³ O iglesia, O katawhan, higalang makasasala, ayaw pagsalig sa uban panglain kondili kang Jesu-Cristo. Ayaw pagsalig diha kang bisan kinsa nga magwawali. Ayaw pagsalig kang bisan kinsa nga maoy moluwas kanimo. Ayaw ihatag ang imong pagsalig sa bisan unsang simbahan, bisan unsang kredo, bisan unsang denominasyon. Salig lamang diha kang Jesu-Cristo, tungod kay Siya mao ang Kahayag sa takna.

Atong iduko ang atong mga ulo.

Maana-ay Kahayag sa tukmang panahon,
 Ang agi-anan paingon sa Himaya imo gayong
 makaplagan;
 Sa agi-anan sa tubig mao ang Kahayag karon,
 Nga gilubong sa bililhong Ngalan ni Jesus.
 Mga batan-on ug mga tiguwang, maghinulsol
 kamo sa tanan ninyong mga sala,
 Ang Espiritu Santo mao gayo'y mobautismo
 kanimo pasulod;
 Tungod kay ang Kahayag sa kagabhion miabot,
 Kini mao ang tinuod nga ang Dios ug si Cristo
 Usa ra.

¹¹⁴ Oh, igsoon nga lalake, ug babaye, kong wala ka pa makahinulsol, kong wala ka pa mabautismohi sa Ngalan ni Jesu-Cristo, makahimo ka ba sa pagsugod niining gabhiona? Makahatag ka ba sa Dios ug kahigayonan aron sa pag-abiabi kanimo diha sa dapit nga makahimo ka sa pagsimba Kaniya? Hinumdumi, nga sa gawas niana, wala nay dapit pa nga gisaad sa Dios aron sa pag-pakigtabo kanimo ug dawaton ang imong pagsimba.

¹¹⁵ Moingon ka, nga “Igsoong Branham, nagsimba man ako nga matinud-anon!” Mao usab kana ang gibuhat ni Cain. Iyang gibuhat ang matag halad nga gibuhat ni Abel, apan sayop kadto nga halad. Tingali’g mosimba ka, ug mohatag sa imong ikanapulo, ug mobuhat sa imong bulohaton ingon nga usa ka Cristohanon nga angay buhaton, walay kalainan ang kamatinud-anon sama sa kang bisan kinsang lalake ug babaye.

Nagbarog ako dinhi karon mga katloan na ka nga tuig, sa tibuok nga ciudad dinhi, ug nagsinggit niining mao ra nga Mensahe. Nagka-anam na ako ug katiguwang. Dili na ako magdugay sa pagpakig-uban kaninyo. Apan hinumdumi, sa Adlaw sa Paghukom, ang akong tingog nahisulat, ug kini maoy mosulti batok kaninyo.

¹¹⁶ Adunay usa lamang ka dapit nga gibutangan sa Dios sa Iyang Ngalan, ug kana wala sa usa ka simbahan, kondili diha kang Jesus. Adunay usa lamang ka dapit alang sa pagsimba, usa lamang ka dapit nga pagadawaton ka, ug kana anaa diha sa Hinigugma, nga si Jesu-Cristo. “Wala nay laing ngalan sa silong sa Langit, nga gihatag sa tawo, nga niini mamaluwas,” walay simbahan, walay kredo, wala nay lain. Si Jesu-Cristo!

Ug kana mao gayud ang Mensahe sa panahon, “Ang pag-uli sa kasing-kasing sa mga anak, balik ngadto sa Pagtoo nga sa maka-usa pa gikatugyan ngadto sa mga balaan.” Dawaton ba ninyo Kini niining gabhiona?

Ug samtang atong giduko ang atong mga ulo.

¹¹⁷ Ug kadtong buot nga mapahinumtum sa pag-ampo, mahimo ba nga inyong iisa ang inyon mga kamot. Dili ta makahimo sa pagpaduol sa altar, tungod sa daghan ra kaayo. Ang Dios magapanalangin kaninyo. Oh na! Diri sa akong wala, sa akong bana-bana adunay mga tulo ka gatus.

¹¹⁸ Karon diri sa akong tuo, mahimo ba nga inyong iisa ang inyong mga kamot, ug moingon, “Buot ko nga mahinumduman.” Sa akong pagbana-bana adunay usa ka gatus ug kalim-an, o kapin, diri sa akong tuo.

Anaay atong tabernaculo diha sa ubos nga adunay dakung linaw sa tubig; ang pastor, usa ka maayong pastor, si Igsoong Orman Neville, mga kaabag, kining mga tawhana nga ania dinhi nga inyong nakita ug nakahimamat. Matag adlaw, matag

gabii, matag takna, mga katawhan nga buot magpabautismo, kanang naghinulsol, sa kanunay kini nagapaabot. Ug kong inyong tumanon kana nga sugo, siguro ka na, pinaagi sa saad sa Dios, kong matinud-anon ka sa imong kasing-kasing, sa pagdawat sa bautismo sa Espiritu Santo.

¹¹⁹ Adunay usa lamang ka dapit sa pagsimba. Karon, wala diha sa tabernaculo. Kana anaa kang Cristo. Unsaon man nato sa pagsulod diha Kaniya? “Pinaagi sa usa ka Espiritu kitang tanan gipangbautismohan diha sa usa ka Lawas.”

Mag-ampo ta.

¹²⁰ Mahigugmaong Dios, maingon nga kining mga kamot gipataas, ilang gipaila kong unsay anaa sa ubos nianang kamot diha sa kasing-kasing, usa ka hugot nga pagtoo nga sila tinud-anay ilang gikinahanglan ang tabang gikan Kanimo. Nag-ampo ako alang sa matag-usa kanila, Amahan. Ug akong kutlo-on ang Imong Pulong. Miingon Ka, “Siya nga nagapatalinghug sa Akong Pulong, ug nagatoo Kaniya nga nagpadala Kanako, may Kinabuhing dayon, ug dili na paga-Hukman; kondili nakalabang na gikan sa kamatayon ngadto sa Kinabuhi.”

Amahan, ingon nga gikan pa lamang sa gawas sa ciudad sa pipila ka mga semana, ug mibalik, nga nangayo, “Bahin *niini* nga usa?”

“Nganong, namiya sila.”

“Bueno, unsa man diay . . .”

“Namiya sila.”

¹²¹ Mahigugmaong Dios, usa’g usa kanamo gipanagtawag, ang matag usa kanamo kinahanglan nga moatubang sa hagit ug malugsong ngadto sa walog sa landong kamatayon. Ug kini angay sa matag-usa kanamo, maingon nga may kamatayon. Apan, niining gabhiona, Imong gihatag kanamo ang Imong hangyo, nga kon motuo lamang kami Kaniya ug magpabautismo sa Iyang Ngalan, nga kami Imong pasudlon. Ug unya dinhi niining maong Lawas, ang Lawas ni Cristo, dili kon diha sa simbahan; kondili diha sa Lawas ni Cristo, kanang maong Lawas gikahukman na. Kini dili na moatubang sa Hukmanan. Gibubo na sa Dios ang Iyang kapungot diha sa maong lawas, ug kanang maong lawas gawasnon na sa sala; ug, maingon nga anaa Kaniya, gihimo tang gawasnon sa sala, pinaagi sa Iyang Paglukat nga namatay alang kanato. Ug diha niana kita adunay pakig-ambitay sa usa’g usa, samtang ang Dugo ni Jesu-Cristo, ang Anak sa Dios, naghimo kanatong hinlo gikan sa tanang sala ug kahugawan.

¹²² Amahan, nga Dios, nagaampo ako nga Imong dad-on ang matag-usa kanila ngadto sa Imong Gingharian. Itugot kini, Dios. Hinaut nga walay usa ka kanila nga mawala; hinaut nga

walay usa batang lalake o babaye, hamtong nga lalake o babaye. Ginoo, ang kadaghanan sa akong kaugalingong katawhan nagalingkod dinhi, niining gabhiona, kadtong nahigawas gikan sa ilalum nianang Dugo. Unsa ka maayo nga akong mahinumduman ang mga pulong sa akong amahan! Ug naga-ampo ako, Mahigugmaong Dios, nga walay usa kanila nga mawala. Itugot kini, Ginoo. Ako nagatoo Kanimo karon, kutob sa tanan nga akong mahimo sa pagtoo.

¹²³ Lihok sa ibabaw sa akong mga kaigsoonang lalake, babaye, sa akong kahigalaan, dinhi niining dapita ning gabhion ug didto usab sa gawas sa halayong dapit pinaagi'g telepono. Kapid-an sa nagkalain-laing mga nasud ang nagapaminaw niini, ang tanan gikan sa Silangang Kabaybayonan hangtud sa Kasadpan. Ako naga-ampo, Mahigugmaong Dios, padulong ug latas ngadto sa mga kaawaawan didto sa Tucson, padulong sa California, ngadto sa Nevada ug Idaho, ibabaw padulong sa Silangan ug libot, sa Texas; samtang kining inbitasyon gihatag, sa mga katawhan nga nagalingkod sa—sa magagmay'ng mga kasimbahanan, sa mga gasolinahan, mga balay puloy-anan, nga nagapaminaw. O Dios, hinaut nga kanang nangawalang lalake o babaye, batang lalake o babaye, niining taknaa, moduol Kanimo. Itugot kini bisan karon dayon. Kini among gipangayo sa Ngalan ni Jesus, aron nga sila makakaplag niining dapit nga may kasigurohan samtang may panahon pa.

Sa diha, among nakita ang sa kamot nga nagasulat diha sa bong-bong, ang kalibutan nagsugod ug kalisang, ang takna sa kagawasan nagkahiduol na. Ang kabahin sa among nasud nagaka-unlod, ang laing bahin nangaligid ug nangasiak pinaagi sa mga linog, maingon sa gisaad ni Jesus nga magakahitabo. Ayaw'g itugot nga magdugay kini kanila, Ginoo. Hinaut nga ilang dawaton kini karon, tungod kay among gitanyag sila Kanimo ingon nga mga ganti sa tigum, sa Maayong Balita, sa Ngalan ni Jesus.' Amen.

¹²⁴ Nagatoo ba kamo Kaniya? Ang Dios magapanalangin kaninyo. Pila kaninyo ang mitoo nga kana mao ang Kamatuoran, sa akong wala, iisa ang inyong kamot. Pila man ang anaa sa tuo, iisa ang inyong kamot. Ang Dios magapanalangin kaninyo. Samtang makita ko pa, ang matag usa. Kana ang Kamatuoran, higala. Ang Dios nasayud nga kana maoy tinuod.

¹²⁵ Karon samtang anaa Kaniya, ug diha Kaniya, kamo adunay alagianan ngadto sa tanan butang nga diin Siya namatay niini. Ug para unsa man ang Iyang pagkamatay? "Siya gisamaran tungod sa atong mga kalapasan, napangus tungod sa atong pagkadautan; ang silot sa atong pakigdait diha sa ibabaw Niya, ug pinaagi sa Iyang mga labod kita nangaayo." Nagatoo ba kamo niana? Nagatoo ba kamo sa Iyang paglukat alang sa kaayohan karon?

¹²⁶ Anaa bay nagmasakiton kanato? Ipaisa ang ilang mga kamot, tuo o wala. Dakung mga panon sa mga masakiton. Dili ako makahimo sa pagpalinya. Nakita ninyo, Walay akong. . . dili mahimo sa pagsaka diri sa intablado. Wala nay panahon sa pagbuhat niini.

Adunay ilang tigum sa pag-ampo didto sa uban mga dapit, alang sa masakiton, diha sa mga kasimbahanan ug mga butang, didto sa tabernaculo.

Mangutana ako kaninyo'g usa ka butang. Pila man ang mga magtutoo nga anaa diha? Iisa ang inyong kamot. Mopadayon ta. Akong kutlon alang kaninyo ang Pulong, nga mao si Cristo. Ang katapusang sugo ni Jesus' ngadto sa kalibutan, ug ngadto sa Iglesia, diay, kini ang Iyang giingon, "Kining mga ilhanan maganunot kanila nga nagatoo; kong ipandong nila ang ilang mga kamot sa ibabaw sa masakiton, mamaayo sila." Pila man ang nahibalo nga kana tinuod, Marcos 16, nag-ingon, "Amen." [Ang Congregasyon miingon, "Amen."—Ed] Padayonon ta. Gihangyo ko kamo ingon nga magtutoo sa pagpandong sa mga kamot diha kang bisan kinsa nga anaa sa inyong atubangan. Ipandong lamang ang inyong mga kamot sa ibabaw kang bisan kinsa nga anaa sa inyong atubangan, ug ang matag-usa mag-ampo sa usa ka pag-ampo alang sa matag-usa karon. Ipatong ang inyong mga kamot sa ibabaw kang bisan kinsa nga anaa sa imong luyo.

¹²⁷ Ginoo, ania sa akong atubangan kining usa ka kahon sa mga panyo, gamay'ng tipik sa mga panapton; pipila ka tigulang nga inahan nga nagahigda sa usa ka dapit, himalasyon, usa ka bata nga himalasyon, mga tawong masakiton bisan diin. Among nabasahan diha sa Biblia nga ang mga masakiton ilang gidad-an ug mga panyo ug mga tapis nga nahidapat sa lawas ni Pablo, ug gidapat nila sa masakiton; ug ang dautan nga mga espiritu, ug ang mahugaw'ng espiritu, ug ang mga balatian, ug mga sakit, namahawa gikan sa katawhan. Karon, Ginoo, nasayud kami nga dili kami si San Pablo, apan nahibalo kami nga Ikaw nagpabilin sa gihapon nga si Jesus, ang bugtong gitagana sa Dios nga dapit sa pagsimba. Ug karon, niining adlaw, kining mga katawhan nagasugid sa ilang managsamang pagtoo, nga nagatoo sama niadtong ginabuhat sa mga katawhan. Sa pagkatinuod Ikaw naghimo ug paagi alang kanila! Ug akong gipatong ang akong mga kamot sa ibabaw niining mga panyo ug nagaampo nga ang mga balatian ug mga pagsakit mobiya sa mga lawas sa mga katawhan samtang ikapatong kini pinaagi sa Ngalan ni Jesu-Cristo.

¹²⁸ Karon, gikatudloan kami, nga maingon nga ang Israel migula gikan sa Egipto, diha sa buyon sa bulohaton, silang tanan nagapanglakaw padulong ngadto sa yuta sa saad. Ang

Dagat nga Mapula diha sa ilang alagianan. Ug ang Dios mitan-aw sa ubos pinaagi sa Haligi nga Kalayo, ug ang dagat nalisang, nalukot pagbalik, ug gipaagi ang Israel padulong ngadto sa yuta sa saad. O Dios, tan-aw sa ubos pinaagi sa Dugo ni Jesus, niining gabhiona, ug hinaut nga ang mga balatian malukot pagbalik, ug si Satanas mopahilayo. Ug hinaut ang mga katawhan molabang ngadto nianang saad sa maayong panglawas ug kusog, nga giingon sa Dios, “Labaw sa tanan mga butang, ako nanghinaut nga kamo magma-uswagong diha sa maayong panglawas.”

¹²⁹ Karon maingon nga nakita Mo didto, Ginoong Jesus, ang mga kamot niining mga katawhan nga nagapandong sa ibabaw sa usa’g usa, ilang gipaila ang ilang pagtoo, nga niana nagaingon Ka, “Kining mga ilhanan maganunot kanila nga nagatoo.” Sila naga-ampo sa ilang kaugalingong pamaagi, alang sa usa’g usa. Ang sunod nga tawo naga-ampo alang kanila.

¹³⁰ Karon, Ginoo, kining maong hagit giatubang na, nga si Satanas, ang dakung malimbungon, siya wala nay katungod sa paggunit sa usa ka anak sa Dios. Siya maoy usa ka binuhat nga napildi na. Si Jesu-Cristo, mao ang bugtong dapit sa pagsimba, ang bugtong matuod nga Ngalan, gidaog siya didto sa Calbaryo. Ug among giangkong ang Iyang Dugo karon dayon, nga gipildi na Niya ang matag balatian, matag sakit.

Ug akong gihinginlan si Satanas nga mobiya niining mga tumatambong. Pinaagi sa Ngalan ni Jesu-Cristo, gumula ka niining mga katawhan, ug sila mamahimong gawasnon.

¹³¹ Ang matag usa nga midawat sa ilang kaayohan sumala sa pamaagi sa nahisulat nga Pulong, magpamatuod kamo pinaagi sa inyong pagtindog ug moingon, “Nadawat ko na karon ang akong kaayohan pinaagi sa Ngalan ni Jesu-Cristo.” Tindog ka diha sa imong mga tiil.

Ang pagdayeg maiya sa Dios! Diha ka na. Atangi dinhi, ang mga bakol ug intawon butang nga nagapanindog na. Maiya ang pagdayeg sa Dios. Mao kana. Toohi lamang. Ania Siya. Labihan ka kahibulungan!

¹³² Sa gawas niining mga tumatambong, didto sa gawas, pinaagi’g mga linya, kinahanglan nga makakita kamo! Sa akong pagtoo ang matag tawo nga ania dinhi, sumala sa akong nahibaloan, o halos silang tanan, niining panahona nagatindog na. Oh, unsa ka kahibulongang takna! Ang Presensiya sa Ginoo, maoy kana! “Diin gani ang Presensiya sa Ginoo, adunay, anaay kagawasan.” Ang Espiritu sa Dios maoy magpahigawas kanato.

¹³³ Karon nga giayo na ta Niya, ato kining gitooan. Giluwas ta Niya; gitooan ta kini. Kadtong gusto nga magpabautismo,

andam na ang linaw. Bisan unsang panahona, bisan unsang taknaa kong gusto kamo moanhi, adunay usa diha nga moatiman niana.

Ug karon sa akong paghuna-huna, sa dili pa nato tapuson, atong awiton ang usa ka karaang awit sa simbahan. “Gihigugma ko Siya, Gihigugma ko Siya tungod kay una Siyang nahigugma kanako.” Ibayaw ang inyong mga kamot ngadto sa Dios ug awiton kini uban sa atong tibuok nga kasing-kasing!

Buot kaming makigkita kaninyo sa buntag, sa mga ika-siyam ug katlo-an kagutlo ang takna, dinhi niining maong tigumanan, alang sa hilisgotan nga *Kasal Ug Diborsyo*. Padayonon ta.

Atong dunganan sa pag-awit kini karon.

Gihigugma ko siya,

Tugoti nga kining dakung mga tumatambong moawit niana karon! Kamo nga anaa sa mga linya, moawit niini, usab.

Tungod kay una Siyang nahigugma kanako
Ug gibayron ang akong kaluwasan
Didto sa kahoy sa Kalbaryo.

¹³⁴ Diin man kini nabuhat? Didto sa kahoy sa Calbaryo. Samtang awiton ta kini sa pag-usab, buot ko nga maglamanohay kamo uban kang bisan kinsa nga anaa sa luyo nimo, ingna, “Ang Dios magapanalangin kanimo, dumoluong.”

Ko . . .

[Si Igsoong Branham nakiglamano uban sa mga kaigsoonan—Ed]

Tungod kay Siya una . . .
Ug gibayran ang sa akong kaluwasan
Didto . . .

¹³⁵ Oh, gihigugma ba ninyo Siya? [Ang Congregasyon miingon, “Amen.”—Ed.] Dili ba nga kahibulongan Siya? [“Amen.”] Siya ba maoy inyong Dapit nga Tagoanan? [“Amen.”] Siya mao ang Bato didto sa usa ka yutang malaay, ang Salipdanan sa panahon sa bagyo, ang bugtong Dalangpanan nga akong nahibaloan. Busa:


Ang akong pagtoo nagalaun Kaniya,
Ikaw nga Kordero sa Calbaryo,
Langitnong Manluluwas;
Karon dungga ako samtang ako nagaampo,
Kuhaa ug ipahilayo ang tanan kong mga sala,
Tuguti ako gikan niining adlawa
Maimo ang kinatibuk-an!

Atong ibayaw ang atong mga kamot samtang atong awiton kini.

Ang akong pagtoo nagalaum Kaniya,
 Ikaw nga Kordero sa Calbaryo,
 O Langitnong Manluluwas;
 Karon dungga ako samtang ako nagaampo,
 Kuhaa ug ipahilayo ang tanan kong mga sala,
 O tuguti ako gikan niining adlaw
 Maimo ang Kinatibuk-an!

Atong iduko ang atong mga ulo karon samtang atong iham kini.

Samtang ang kangitngit ug kalibug akong
 gitaak,
 Ug nabuklad ang kagu-ol libot kanako,
 Ikaw ang akong Giya;
 Paabota nga ang kangitngit mahimong
 kahayag,
 Pahiri ug isalikway ang luha sa kaguol,
 Ni ako imong tugutan nga mahisalaag
 Gikan sa Imong kiliran

Samtang inyong giduko ang inyong mga ulo, ang minahal nga pastor, si Igsoong Orman Neville, maoy magapagula sa mga tumatambong. 

*Ang Dapit Nga Gipili Sa Dios Sa Pagsimba, Bol. 1 Nu. 4
 (God's Chosen Place Of Worship, Vol. 5 No. 7R)*

Kining Mensahe ni Igsoong William Marrion Branham, Unang giwali sa pinulungang Ingles niadtong Sabado sa gabii Pebrero 20, 1965 sa Parkview Hataas nga Tolón-anan sa Jeffersonville, Indiana, U.S.A., mao'y gikuha gikan sa usa ka magnetik teyp recording ug giimprinta sulod niini sa hingpit sa pinulungang Ingles. Kining paghubad sa pinulungang cebuano giimprinta niining tuig nga 2001 sa:

VOICE OF GOD RECORDINGS
 P.O. Box 950, Jeffersonville, Indiana 47131 U.S.A.

Copyright notice

All rights reserved. This book may be printed on a home printer for personal use or to be given out, free of charge, as a tool to spread the Gospel of Jesus Christ. This book cannot be sold, reproduced on a large scale, posted on any website other than www.branham.org, stored in a retrieval system, translated into other languages, or used for soliciting funds without the express written permission of Voice Of God Recordings®.

For more information or for other available material, please contact:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org